


DIMIINU DYÀ

DIPANGAKANANGANA

 Ndi musungule kaacyena bwalu kipi diloolo edi, anyi kubala kwipi, bu Mukalenge mwa kwanyisha, bwa kutupa dyumvwija dyaku, mu Maataayi Munsantu 13.24 too ne ku 30. Ne pasiishe ndi—ndi muswe kabidi kubala kuumukila ku 36 too ne ku 40, anu mu katanzi kakese cyanaana. Mpindyewu Maataayi Munsantu, nshapita wa 13, biikale tubangila ku mvensa wa 24 wa nshapita wa 13 wa Maataayi Munsantu. Teelejaayi ne ntema kubala kwa Diyi. Meyi aanyi memè neapangile, kadi Ende Yèyè kaakupangila to.

Yèyè wakabeelela lusumwinu lukwabo, wamba ne: Bukalenge bwa mu dyulu mbufwanyikijibwe ne muntu wakamyamina mamiinu mimpè mu budimi buende.

Kadi pavwaye yèyè mulaale, mwena lukuna wende kulwaye e kumyaminaye lupela munkaci mwa blé, ke kukwataye njila e kuya.

Kadi paakatoloka tubeji, ne kukwama mamuma, ke lupela kumwenekalu paalu.

Ke basadidi baa mwena nzubu kulwabo e kumwambila ne: Mukalenge, wèwè kuvwa mumyamine mamiinu mimpè mu budimi bwebe anyi? kadi mmunyi mukaadibu ne lupela?

Ke yèyè kubambila ne: Mwena lukuna ngudi mwenze eci ewu. Ke basadidi kumwambila ne: Nenku udi muswe bwa twètù kuya . . . kulusangisha anyi?

Kadi yèyè wakamba ne: To, bwalu panwikala nusangisha lupela, nwènù kanwikadi nwâlwa kujuula blé pamwe naalu.

Nubilekele byònsò bibidi bikole pamwe too ne ku dinowa, nenku mu cikondo cya dinowa memè nêntumè banowi ne: Sangishaayi lupela dyambedi, ne nuluswike mu tusumbu tusumbu bwa kulwosha, kadi nusangishe blé numubweje mu diyeeba.

² Nwamonu ne: “Sangishaayi lupela dyambedi, nuluswike” anyi? Mpindyewu, pâmvwà mbala cyôci eci, cintu cya pabwaci cyakamvwila pâmvwà musombe pa mutu wa Mikuna ya Catalina diloolo kampanda, mwikale nsambila. Ke pa dîbà adi memè kudyambidila ne: “Mpenyi pândiku mufwanyine kwangulaku dîyi dîndi mufwanyine kukwata naadi mudimu bwa cîndi njinga kwamba diloolo edi?”

³ Ke mêmè kupweka e kupeta mwaku wa *dipangakanangana*, ke mêmè kwangata mukanda wa mbumbilu wa myaku e kukeba cidi *dipangakanangana* dyumvwija. Nenku didi dyumvwija ne didi “kubweja dibenga kupetangana,” anyi—anyi, “kwikala mu dibengangana,” mudi Webster wamba, “kubweja dibenga kupetangana, cintu cishiilangane,” anyi, “kwikala mu dibengangana ne cikaadiku.” Pa nanku mêmè kudyambidila ne, cyena bwalu cya diloolo edi, ndi mufwanyine kuciinyika dîna ne: *Dimiinu Dyà Dipangakanangana*. Nenku ndi ne dyeyemena ne Mukalenge neabeneshe Dîyì Dyende mpindyewu patudi tuDilenga apa.

⁴ Kabidi tudi bamanye ne Yêyè wakumvwija, mu mvensa ewu wa 36 ne—ne too ne ku wa 43, mushindu wakaboba dimiinu diine edi. Nenku patucidimu apa, tuyibalaayi paayi, mvensa ewu wa 36 mpindyewu too ne ku wa 43.

Nenku *Yesu* paakamanaye *kutangalaja musumba wa bantu awu*, Yêyè wakabwela mu nzubu, ke bayiidi bende kulwabo kudiye, kwambabo ne: *Ûtûmwijè lusumwinu lwa lupela lwa mu budimi*.

Ke Yêyè kwandamuna e kubambila ne: *Ewu udi umyamina mamiinu mîmpè m’Mwânà wa muntu*;

Ne budimi mbuloba; mamiinu mîmpè mbânà baa bukalenge; kadi lupela mbânà baa mubi;

Mwena lukuna udi uàkùna ndyabulu; dinowa nnsiikidilu wa buloba; ne banowi mbanjelo.

Ke bwa cinyi anu mùtùbo basangisha lupela bwa kulwosha mu kapyà amu, ke mwikalabi kabidi kunshiikidilu kwa buloba ebu.

Mwânà wa muntu neatume banjelo bende, ne bôbò nebasangishe mu bukalenge bwende bintu byônso bidi bifila cilendwishi, ne aba badi benza bubu;

Ne nebàbyèlè mu kapyà, cikutu cya kapaya, nenku nekwikale myadi, anyi ditwa dya mikemu ne disumakaja dya mènù.

Pashiishe baakane nebabalakane bu dîbà mu bukalenge bwa Taatu wabo. Ewu udi ne dici . . . ùmwè.

⁵ Ke Yesu udi ufila dyumvwija dya lusumwinu awu, Yêyè mwine, ke bwa cinyi tudi tumanya dîbà adi cidi dyumvwija diswa kwamba. Nenku mpindyewu bu mutudi tulenga bwalu ebu, bwa dimyamina edi dya mamiinu ne—ne bwa dinowa, mpindyewu Yêyè ngudi ubumvwija ewu. Nenku ndi ngitabuuja ne Yesu uvwa wela lusumwinu elu mu dituku Dyende, kadi mwikale uswa kwamba ne kuvwa nkunshiikidilu kwa buloba, anyi, nshiikidilu wa cikondo, mbwena kwamba ne dituku *edi*. Nenku ndi ngitabuuja ne kaacyena bwalu kakese aka diloolo edi nkakumbanangane ne dîbà ditudi ne mwoyi edi, bwalu

Yesu mmwambe anu bitooke tòò mwaba ewu ne “disangisha kaaba kamwe nedyenzeke kunshiikidilu kwa buloba ebu,” ne mpiikala nshiikidilu mwa kulwa; disangisha kaaba kamwe dya blé, kabidi ne disangisha kaaba kamwe dya lupela ne dilwosha, ne dibweja dya blé mu Bukalenge. Nenku ndi ngitabuuja ne bivwa mushindu awu.

⁶ Nenku Mufundu mukwabo ùdi ùndombolà ku diitabuuja mushindu ewu, ndi muwufunde mwab’ewu, m’Maataayi 24.24, mudibo bacyāmbè, mudibo baakula bwa di—dimiinu—dimiinu dya dipangakangana. Yesu mmwambe ne ónsò abidi neikale matambe kufwanangana mu mushindu wa bifwanyine kuseeswisha ne Basungula mene bu ne bivwa mwa kwenzeka. Byambe kwikala anu cintu cimwecimwe aci menemene.

⁷ Mwaba mukwabo mu Mifundu mudibo bafunde ne, mvula utu umacila ne baakane ne babi.

⁸ Ndi mvuluka dilabula dyanyi dya kumpala dya pāncivwà mfikilaku munkaci mwa beena Mpenta. Mvwa mu Mishawaka, Indiana. Nenku mvwa nsanganyiibwa mu cibilu cinene, nzubu mwalabale wipacilangana ne ewu, mvwa Nord ne Sud bitwilangane. Bwalu mu miine matuku awu, bwa disungulujangana, bivwa bikengela bakasangile kwòkò aku. Bavwa mishindu minene ibidi ya bānà beetu baa cyena Mpenta. Ncivwaku mwanji kuumvwa baakula bwa bwalu bwabo anyi mwanji mene kutwilanganaku naabo kacya to. Wanyi paanyi musangu wa nzānzānzā wa mēmè kuumvwaku dyakula dya mu myakulu. Nenku kundekeelu kwa mulongo, kwa cibilu aci . . . Bu mūmvwà mēmè nciyi umwe wa ku bidimba byabo to, mvwa anu mwambi wa ba-Baptistes wa kânākânà, ke mēmè kusòmbela lwa mundekeelu menemene. Nenku ndi mvuluka musangu wa nzānzānzā wa mēmè kuumvwaku muntu wakula mu myakulu, nciyi nanshà mwa kumanya ne biine byònsò abi bivwa mbinganyi—mbinganyi to. Ke pashiishe bantu balume babidi aba, bôbò abu nangananga, bavwa basòmbèle lwa kumpala, umwe uvwa mwa kwakula mu myakulu ne mukwabo uvwa mwa kwandamuna bivwa muntu awu wamba. Ee, ke mēmè kuditwa mu dilonga dya Bible wanyi ne mwanyi mwònsò, mwaba awu pa dībà adi, nenku mēmè kujandula ne civwa ncyā mu Mifundu. Cyôci aci ncivwa menemene Mifundu, ncivwa Nyuma Mwîmpè mwa kwenza.

⁹ Ee, bu dituku dimwe paanyima paa cyôci aci . . . Bufuku abu mwoyi wanyi uvwa anu kuulukuulu be. Mēmè kulaala mu budimi bwa matala. Ncivwa ne mfranga mikumbane bwa kupeta bu—bu—bulaalu to, kadi mvwa ne mfranga mikumbane anu bwa kwalukila kumbelu, ke mēmè kusumba ndambu wa bitumbula, bimane kulaala matuku abidi, anyi tuumâmpà, ntwòtò, ne bwa didya dyanyi dya mu dinda. Ne bôbò biine bavwa mene anu bangaakidile bwa mēmè kudya naabo, kadi ncivwa ne mfranga ya kwelamu to. Mu matuku awu, civwa cikondo civwa mfranga

mikole bwa kuyipeta, mu 1933, pa nanku kuvwa—kuvwa lutatu lukole be. Ke mèmè kudyambidila ne: “Ee, nèn-. . .Ncyèna muswe kudya naabo to, kadi ndi muswe kumanya ne cidibo naaci ncinganyi. Badi ne cintu kampanda cìndì mèmè nciyi naaci to.”

¹⁰ Pa nanku mu dinda amu mvwa . . .kundombabo ne: “Bambi bônso balwe pa cibumba cya ku cyambilu eku nenku uditeeja anu cyanaana, ne udi nganyi, udi mufumine penyì.”

¹¹ Ee, mèmè—mèmè kwamba anu ne: “William Branham, mutangadiki, Jeffersonville,” paanyi kusòmba. Ee, piine apu mèmè ke mwambi uvwa mwànà ku bônso pa cibumba cya ku cyambilu apu. Nenku dituku dyakalonda bôbò kumbiikila ku cyambilu bwa mèmè kuyiisha. Nenku paanyima paa mèmè mwakule, mona’s, twètù kupicisha cikondo cya dicyonkomoka, ke pashiishe mèmè kubanga kupetangana ne bantu bashiileshiilangane bambiikila bwa kuya ku ekeleeziya yabo. Nenku paanyima paa bôbò . . .

¹² Paanyima paa cyôcì aci, mona’s, mèmè kudyambidila ne: “Bu mèmè nanshà mwa kupeta mwaba udi bantu babidi baa bamweneke bavwa baakula mu myakulu kadi kwandamuna abu!” Ke civwa cingosha mu mwoyi, ncijinga ngamba kufwa. Ee, anu mûngãnwãmbidì ku ntwadijilu amu, kaadipà kakese kaudi ukoka’s. Nudi bamanye, mapà ne mabiikila kaàtu a banyingalala to, udi naawu matuku ebe ónsò a mwoyi, nudi numona, udi mulediibwe naawu, piikalawu ne mmapà a kudi Nzambi. Nenku mèmè misangu yônso, kubangila anu pãncivwà mwànà mukese menemene, bivwa misangu yônso anu bingenzekela, bwa bantu badi bamanye mu nsòmbelu wanyi yônso, mbamanye ne ncyà bushuwa. Ee, piikalabi ne mvwa ndyambidila . . .Ncivwa mumanye ne civwa ncinyi mwine musangu awu to, ne kucibiikila ne ncikeena-kumona, ncivwa mumanye mene ne civwa ncinyi to. Kadi ke mèmè kudyambidila ne: “Bu mèmè mwa kupetaku mushindu wa kuyiikila naabo!” Ee, ne nyuma mwine uvwa mu nzubu amu uvwa uumvwika anu bu ne uvwa Nyuma mulelela wa Nzambi.

¹³ Ke mèmè—mèmè kufika ku diyiiikila ne umwe wa ku bôbò, ne mèmè kumwelaku ndambu wa nkonko, kadi uvwa mwena Kilisto mulelela ne mwinènkà. Kakuvwa mpatà nansha mikese bwa bwalu abu to, muntu awu uvwa mwena kwitabuuja mulelela. Kadi mukwabo muntu awu, pãngãkayiiikilã nende, byôbì ne nkaadiku mupetangane ne mwena lubombo, yêyê awu uvwa umwe wabo. Mu bushuwa bwa bwalu muntu awu uvwa . . . Mukajende uvwa mukaji wa nsuki ya mvwangala, ne ukaavwa mulele . . .bànà babidi ne mukaji kampanda wa nsuki mifiike. Ke mèmè kudyambidila ne: “Ee, mpindyewu kadi ke cinyi eci? Ke bwalu ebu’s, mèmè’s—mèmè’s nyewu byalu kumbwelakana. Mèmè ndi mwitabi wa maalu anu mudibo baãfunde; anu cyôcì ciikale Dìyì, bwa cyanaana kì ncyà bushuwa to. Nenku’s ke Nyuma awu nyêyê ewu, umwe uumvwika, bilondeshile byônso

bîntù mumanye, mulelela; kadi mukwabo yêyè kayiku mwîmpè to nansha kakese; kadi Nyuma mwikale ubapwekela bônso babidi. Mpindiyewu, aci cidì mwa kwenzeka bishi?" Mêmè, aci nanku kadi kumpandaci mutu.

¹⁴ Paakapitaku bidimu bibidi, mvwa nsambila mu nyongolo mûmvwà nsambilasambila. Mu nyongolo amu kulwamu lupwishi be, ke mu mapingaja kampanda mêmè kupatukila pambelu, kuteeka Bible wanyi pa mucì uvwa mulaale panshi, ke lupeepele kuMubuulula mu Ebelu, mu nshapita 6. Mwaba awu mwikale wamba ne, ku matuku a ndekeelu, muvwabi mwa kwikala bu twètù badishinde buumuke ku Bulelela ne kudivwija cyakabidi bapyabapya bwa kwalukila ku kanyinganyinga, kakuvwa kabidi mulambu bwa mpekaatu to, ne muvwa mêmè ne mingonga, bivwa pabwîpì ne kubengiibwa, ndekeelu wabi mwikale mbwa kubyoshabo; kadi mvula utu uloka pa buloba, misangu yàbûngì, bwa kubumyamina màyi, bwa kubwakaja; kadi mêmè ne mingonga nebibengiibwe, kadi blé neasangishiibwe. Ke mêmè kudyambidila ne: "Ee, lupeepele ndudi ne cya kwikala lumubuulule paalu nanku awu." Ee, ke mêmè kuteeka cyakabidi Bible awu panshi. Ke mêmè kudyambidila ne: "Ee, mpindiyewu nêngikalè anu..." Ke lupeepele lulwalwa elu kadi kuMubuulula. Kwenzekaci misangu isatu mijima. Ke mêmè kudyambidila ne: "Ee, mpindiyewu, aci's ncyà pabwaci."

¹⁵ Ke pashiishe pângàakabàndulukà, mêmè kudyambidila ne: "Mukalenge, bwa cinyi Wèwè wâjingì kubuulula Bible ewu bwa mêmè kubala bwalu abu, mêmè... pângàpwekì ngenda mbala too ne ku cyôci aci, mwaba udi 'mêmè ne mingonga, bidi pabwîpì ne kubengiibwa, ndekeelu wabi nkwoshiibwa?'" Mêmè kudyambidila ne: "Bwa cinyi, Wâjingì kumbuulwila mwaba awu?" Nanku pâmvwà mutangile pambelu apu... .

¹⁶ Mpindiyewu, bikeena-kumona bilelela ebi bitu bilwa kabiyi bya ngenza bya ku bukole to. Aci cidì anu Nzambi. Nwamonu anyi? Mêmè kutangila e kumona buloba kampanda bwikale bunyunguluka kumpala kwanyi aku, kadi mêmè kubumona babudime bwônso. Kuvwa muntu muvwale bilàmbà bitooke, uya eku ne eku wenda umyamina blé. Nanku paanyima ke kuyaye kujimina ku mfudiilu wa buloba; ke muntu kampanda kulwaye, ne mmwenekelu wa ukwacisha bwôwà, muvwale bilàmbà bifiike, mwikale wenda ukupa mamiinu a bisoosa bibi myaba yônso. Ônsò abidi e kutolokawu. Ne paakatolokawu, ônsò abidi kupetawu nyoota, bwalu kuvwa djinga dya mvula. Ke kumwenakawu bu ne dyônso dya kudiwu divwa munkaci mwa kusambila, ne mutu wadi mukese awu mwinyika ne: "Mukalenge, tuma mvula, tuma mvula." Ke mavuba manene kujuuka, ne mvula kuàlokela ônsò abidi. Paakalokaye, blé mukese awu kutupika e kubanga kwamba ne: "Mukalenge atumbe! Mukalenge atumbe!" Ne bisoosa bibi

bikese abi kutupikabi anu luseke lumwelumwe alu, byamba ne: “Mukalenge atumbe! Mukalenge atumbe!”

¹⁷ Ke pa dîbà adi cikeena-kumona aci kupetaci dyumvwija: Mvula utu ulokela ne baakane ne babi. Nyuma Mwîmpè umweumwe awu udi mwa kupona mu disangisha kampanda, muntu ne muntu uditwa mu disanka: beena lubombo, beena Kilisto, ne bônso pamwe. Cya bushuwa menemene. Kadi bwalu budi cinyi? Ku mamuma abo nkudibo babamanyina. Nwamonu anyi? Ke mushindu umwepele udici mwa kumanyika.

¹⁸ Pa nanku nudi numona cyôci aci mpindyewu, bu mudi mponda wa cisuku, anyi blé ne dimiinu bya cisuku biikale misangu mikwabo bitentula blé mulelela, dimiinu dya kumbelu, bitambe kufwanangana mu mushindu wa bifwanyine kuseeswisha too ne Basungula biine. Ngela meeji ne tudi ne mwoyi mu cikondo cikumbane menemene, cidu bintu ebi bikengela kuyiishiibwa ne kwakula pa byôbi.

¹⁹ Monaayi mu mvensa wa 41, bibidi biikale kabidi bifwanangana, bifwanangane menemene mu matuku a ndekeelu mu mushindu wa Yèyè kayi mwenze. . . Yèyè kayi mwa kushaala mweyemene ekeleeziya kampanda bwa kuâtâpulula to, wamba ne, wa ba-Méthodistes anyi wa ba-Baptistes, anyi wa beena Mpenta, bwa kuâtâpulula. Yèyè wakamba ne: “Udi utuma banjelo Bende bwa kuâtâpulula.” Mwanjelo ke udi ulwa kufila ditapulula, disunguluja pankaci paa cya bushuwa ne cya mafi. Ne kakwena nansha umwe udi mwa kucyenza to anu Mwanjelo wa Mukalenge. Anu Yèyè ke wikala mwa kwamba cidu cya bushuwa ne cidu cya mafi. Nzambi mmwambe ne Yèyè neatume banjelo Bende ku bikondo bya ndekeelu. Pa kuumusha banjelo baa bapweka bapicila *apa* to, kadi banjelo ku cikondo cya ndekeelu, ne bôbô mbavwa ne cya kusangisha pamwe. Tudi bamanye ne eci ke cikondo cya dinowa civwa ne cya kulwa mpindyewu. Mpindyewu, *mwanjelo* mbamuumvwije cya bushuwa ne udi “musanjeela.” Ne tudi tumona ne kudi banjelo mwandamutekete baa ekeleeziya mwandamutekete, ne mpindyewu. . . to, kupicila mu ekeleeziya mwandamutekete.

²⁰ Monaayi ne Yèyè wakamba ne banowi mbanganyi, kabidi ne dimiinu divwa ncinyi. Umwe, munowi uvwa n’Yèyè, Mwânà wa Nzambi, Uvwa mupatuke wenda umyamina Dimiinu. Ke mwena lukuna kulwaye paanyima Pende, uvwa dyabulu, ke kulwa kumyamina dimiinu dya dipanganangana, paanyima paa dimyamina dya Dimiinu dya bushuwa. Mpindyewu, balunda baanyi, aci ke cidu cyenzeke mu cikondo ne cikondo cyônso kacya anu twâpeta dyulu ne buloba. Menemene. Kubangila anu ku cibangidilu kwaka, cyakabanga anu cintu cimwecimwe aci.

²¹ Mpindyewu Yèyè kwamba ne: “Dimiinu dya Nzambi, Diyè dya Nzambi.” Yesu wakamba, kaaba kampanda, ne “Diyè n’Dimiinu.” Ne dimiinu dyônso nedivulangane bilondeshile

mushindu wadi. Nenku mpindyewu piikala mwena Kilisto, bânà baa Nzambi, bânà baa Bukalenge bashaale Dimiinu dya Nzambi, nanku's badi ne cya kwikala Dîyî dya Nzambi, Dîyî dya Nzambi dimweneshiibwe mu cikondo cidibo ne mwoyi, bwa Dimiinu dilaya dya cikondo aci. Nzambi wakafila Dîyî Dyende ku cibangidilu, ne cikondo ne cikondo cyakapeta Dimiinu dyaci, dîbà cyaci, milayi yaci.

²² Mpindyewu, paakabwela Noa mu cyalu, uvwa Dimiinu dya Nzambi, Dîyî dya Nzambi bwa cikondo aci.

²³ Paakalwa Môsà, kavwa mwa kulwa ne mukenji wa Noa nansha, kabivwa mwa kukumbana to, bwalu yêyè uvwa Dimiinu dya Nzambi mu cikondo aci.

²⁴ Pashiishe paakalwa Kilisto, Yêyè kavwa mwa kulwa ne cikondo cya Noa anyi cya Môsà to; aci civwa n'Cyende cikondo, bwa virgo kwimitaye difu ne kulelaye Mwânà wa balume, ne Yêyè ewu nguvwa mwa kwikala Maasiya.

²⁵ Mpindyewu, tudi bapicile mu cikondo cya Luther, cikondo cya Wesley (cikondo cya ba-Méthodistes), twenda tucicila mu bikondo abi, ne mu cikondo cya beena Mpenta, ne cikondo cyônsò ncipeebwe mulayi wa Dîyî. Ne bantu baa ciine cikondo aci, badi bamwenesha Dîyî dilaya adi, ke badi Dimiinu dya cikondo aci, bilondeshile cidi Yesu mwambe apa mene ne: "Mbânà baa Bukalenge." Ncya bushuwa. Dimwenesha dya Nyuma Mwîmpè mwikale ukwacila mudimu mu bânà Bende ke dyôdi Dimiinu adi dya Bukalenge bwa ciine cikondo aci.

²⁶ Monaayi, lupela ke yêyè awu, mwena lukuna, Sataana, udi mummyamine dibenga kupetangana, anyi di—anyi dimiinu dya dipangakanangana, yêyè ngwâkambula dipiila dya kwikala mwenze cintu cya cikwacisha bwôwà eci. Sataana wakamyamina dyende dimiinu kuumukila anu ku cibangidilu, paakateeka Nzambi Dyende dinowa dya kumpala dya bukwabantu pa buloba. Adama, mu bushuwa bwa bwalu, ukaavwa anu mumanye ne kuvwa di—dimanya kampanda dya bulelela, ne dya maalu mîmpè ne maalu mabi, kadi kavwa mwanji kukufikaku to.

²⁷ Kadi nyewu tujandula ne, Nzambi wakapa bânà Bende Dîyî Dyende bu Ngabu. Wabo. . .Katwena ne Ngabu mukwabo to pa kuumusha Dîyî dya Nzambi. Ke wetu Ngabu nyêyè awu. Kakwena nî mbômbès, nî mbiikishilu, nî mbisokomenu, nî mma-Arizona anyi ma-Californie, nî mpenyi pônso; kudi anu Ngabu umwepele utudi nende, ke Dîyî. Ne Dîyî dyakandamuka mubidi ne dyâkasômba munkaci mwetu, ke Kilisto Yesu. Yêyè ke wetu Ngabu umwepele. Patudi munda Mwende Yêyè, tudi mu dikubiibwa.

²⁸ Nansha mpekaatu mwine kabeena bamubadila mwena kwitabuuja mulelela to. Nuvwa bamanye aci anyi? Ewu udi mulediibwe kudi Nzambi, katu wenza mpekaatu to,

kêna mwa kwenzaku mpekaatu to. Nwamonu anyi? Kabeena nansha bamubadilaye to. Mona's, Davidi wakamba ne: "Muntu mubeneshiibwe ngewu wîkala Nzambi kayi ubadila mpekaatu." Paudi munda mwa Kilisto, kwêna ne dijinga dya kwenza mpekaatu to. "Mukuukwidi, padiye anu ukezudiibwa, kâcyenâ kabidi ne dimanya dya ne mpekaatu udiku to," kwêna umujinga to. Mpindyewu, bwa baa pa buloba, udi mufwanyine kwikala ngenzâmpèkââtù; kadi, bwa Nzambi, to, bwalu udi munda mwa Kilisto. Mmunyi mùdi mwa kwikala mu ngenzâmpèkââtù paudi munda mwa Ewu udi kayi ne mpekaatu, ne Nzambi nyawu udi umona anu Mwena munda mùdi wêwè awu?

²⁹ Mpindyewu cikondo cya dinowa eci. Ku cibangidilu, paakamyamina Nzambi Dimiinu Dyende pa buloba ne kuDifila mu myoyi ya bânâ Bende, famiye Wende, bwa kulamabo Dìyì adi, ke civwa wabo ngabu umwepele, kulama Dìyì adi! Ke mwena lukuna udi ubwela ewu e kucibulaye mukalu awu, pa kumyamina dimiinu dya dipangakanangana, dibengangana ne Dìyì dya Nzambi. Piikaladi divwa dipangakanangana ku cibangidilu, dicidi dyôdi adi. Cyônsò cyasakidila kantu ku Dìyì dya Nzambi aci, cicidi anu dimiinu dya dipangakanangana! Nansha cifumine penyi, nî ncifumine kudi bulongolodi kampanda, nî ncifumine ku busalaayi, nî ncifumine ku makole a cididi, cyônsò cidi cibengangane ne Dìyì dya Nzambi aci, ndimiinu dya dipangakanangana.

³⁰ Padi muntu ujuuka wamba ne mmuyiishi wa Evanjeeliyo, kadi wamba ne "matuku a bishima akaadi mamane kupita," aci ndimiinu dya dipangakanangana. Padi muntu ujuuka wamba ne mmwambi, mpaasata wa ekeleeziya mwaba kampanda, kadi kayi witaabuja ne Yesu Kilisto udi umweumwe awu mu kantu ne kantu (pa kuumusha pa bidi bitangila mubidi wa musunya), umweumwe awu makeelela, leelu, too ne kashidi, aci ndimiinu dya dipangakanangana. Padiye wamba ne "bishima ne cikondo cya bapostolo bikaadi bimane kupita," aci ndimiinu dya dipangakanangana. Padibo bamba ne: "Cintu paaci ne ndyondopa dya kudi Nzambi kacituku to," aci ndimiinu dya dipangakanangana. Ne buloba mbûle tente ne dyôdi adi. Ndibwikidije blé ne didi dimupatakaja.

³¹ Tudi tumona ne mummyaminyi wa kumpala wa dimiinu dya dipangakanangana wakatwibwa citampi ne "dyabulu," ne tudi bamanye ne uwva nyêye, mu Genesè 1. Mpindyewu nyewu tujandula, ne mwaba ewu mu—mu Mukanda wa Maataayi, mu nshapita wa 13 ne, Yesu ucidi anu utwa dipangakanangana dyônsò ku Dìyì Dyende citampi ne "dyabulu." Ne mu 1956 emu, cyônsò cidi cimyamina dipangakanangana, cibengangana ne Dìyì dya Nzambi difunda, anyi cyelaKu dyaci dyumvwija dya paa nkaayaaci, ndimiinu dya dipangakanangana. Nzambi kaakucipa buneeme to. Nansha. Kabyakubwelakananganaku to. Neya bushuwa nanku. Ncyenze bu dimiinu dya mùtâdâ,

kadyakubwelakananganaku ne cintu cikwabo cyônsò nansha, kakwena mushindu wa kudisambakaja to, bikengela ciikale anu cintu cilelela. Dimiinu dya dipangakanangana.

³² Mpindyewu tudi tusangana ne, paakamyamina Nzambi Dimiinu Dyende mu budimi bwa Edena, tudi tujandula ne dyakapatula Abele. Kadi paakamyamina Sataana dimiinu dyende dya dipangakanangana adi, dyakapatula Kaayina. Edi dipatula mwakane; edi dipatula mubi. Bwalu Eva wakateeleja diyi dya dipangakanangana, dibengangane ne Diyì dya Nzambi, ne dyakabanga kubunguluja ndundu wa mpekaatu anu mwaba awu, ne didi dimubunguluja kubangila anu piine apu. Ne twètù katwadyakudyumusha dyônsò to too ne paalwa banjelo kusunguluja cintu aci, ne Nzambi wangata bânà Bende uya naabo mu Bukalenge, nenku lupela nelwoshiibwe. Monaayi mici ibidi ya mvinyo ayi.

³³ Bu ne tuvwaku ne dibà dyàbúngì pa cyena bwalu eci, anu dya kulenga tuubintu pa tunene tunene, bwa twamona mwa kubwela buludi mu disambidila babeedi mu tusunsa tukese tudi tulonda etu.

³⁴ Monaayi, mamiinu abi akakolela pamwe anu menemene mwakamba kabidi Nzambi mu nshapita wa 13, wa kubala kwetu kwa diloolo edi eku, mu Maataayi ne: “Alekelaaayi akolele pamwe.” Mpindyewu, Kaayina wakaya ku buloba bwa Nod, kupetaye mukaji, kuselaye; kadi Abele wakashiibwa, ke Nzambi kujuula Sete bwa kwangataye kaaba kende. Ke nkongo kubangayi kutungunuka, pankaci paa cya bushuwa ne cya mashimi. Mpindyewu, tudi tumona ne akadisanga, dyônsò dya kudiwu, ku cikondo ne ku cikondo, ne kukengelabi bwa Nzambi... Akashaala mabi menemene mu mushindu wa ne byakakengela bwa Nzambi aabutule.

³⁵ Kadi ndekeelu wa byônsò akakwama mamuma mu mushindu wa ne mamiinu ônsò abidi awu, dimiinu dya dipangakanangana ne Dimiinu dya Nzambi, kupatulawu mitu yawu milelela, ne akaya kuupuka ku Yudaasa Mpongoloki ne Yesu Kilisto. Bwalu, Yèyè ke uvwa Dimiinu dya Nzambi, Yèyè ke uvwa cibangidilu cya bufuki bwa Nzambi, Yèyè kavwa cingà cintu cishaadile to anu Nzambi mene. Kadi Yudaasa Mpongoloki wakalediibwa mwânà wa kabutu, mufumine mu iferno, mwalukile mu iferno. Yesu Kilisto uvwa Mwânà wa Nzambi, Diyì dya Nzambi dimweneshiibwe. Yudaasa Mpongoloki awu, mu dipangakanangana dyende adi, uvwa dimiinu dya dyabulu, dilwe pa buloba, bwa kuseeswishangana; anu muvwaye ku cibangidilu, Kaayina, nkambwa wende.

³⁶ Yudaasa yèyè uvwa anu ushimakaja bu uyààya mu ekeleeziya. Mu bushuwa bwa bwalu yèyè kavwa ne meeji matooke to. Kavwa ne diitabuuja dyetu dya bushuwa edi to; kavwa mwa kwikala kutungile Yesu to. Kadi, monaayi, yèyè

wakamyamina dimiinu dya dipangakanangana adi. Uvwa udyambidila ne uvwa mwa kudya bulunda ne maalu a pa buloba, mamona, mwikale kabidi mudye bulunda ne Yesu, kadi dībà dikaavwa dipite bwa kwenzaye cintu kampanda pa bwalu abu. Paakafika dībà dya bwalu kashondo, paakenzaye cintu cibi eci, wakasambuka mukalu wa pankaci paa diya kumpala ne dyalukila dya cyanyima. Byakakengela bwa yèyè kuya mutungunuke mu njila ukaavwaye wenda ulonda awu, bu museeswishanganyi. Uvwa wenda umyamina dimiinu dya dipangakanangana, uteeta bwa kulengeleela malongolodi a dituku adi, kudi Bafaalesa ne Basadoka. Ke kudyambidilaye ne uvwa mwa kupetaku ndambu wa mfranga, ne uvwa mwa kwikala lwakamanyabo munkaci mwa bantu. Piikala aci kacyi cifikisha bantu bààbûngì ku dibwela mu dipangakanangana adi, kuteeta bwa kulengeleela bantu! Tukebaayi bwa kulengeleela Nzambi, kî mbantu to. Kadi ke cyakenza Yudaasa paakapatula dipangakanangana edi mutu mu yèyè.

³⁷ Kadi tudi bamanye ne Yesu uvwa Dìyì, Yone Munsantu 1, mmwambe ne: “Ku cibangidilu kwakadi Dìyì, ne Dìyì dyakadi ne Nzambi, ne Dìyì dyakadi Nzambi. Ne Dìyì dyakandamuka mubidi ne dyàkasòmba munkaci mwetu.” Nenku, Dìyì didi Dimiinu, ke Dimiinu kwakandamuka mubidi e kusòmba munkaci mwetu.

³⁸ Piikalabi ne Yudaasa uvwa dimiinu dya mwena lukuna ne dya dipangakanangana, dyakandamuka paadi mubidi ne dyàkasòmba munkaci mwetu mu muntu ewu Yudaasa Mpongoloki. Yèyè kavwaku ne diitabuuja dya bushuwa, dya bushuwa edi to. Yèyè uvwa ne civwaye *udicinkila* ne ndiitabuuja aci. Kutu cikwabo cintu paaci ne nkwikala ne diitabuuja; kadi ciikale diitabuuja dya buidingibudingi.

³⁹ Kadi diitabuuja dilelela mu Nzambi nediitabuuje Nzambi, ne Nzambi n’Dìyì, ne dyôdi adi kadyakusakidilaku kantu ku Dyôdi to. Bible udi utwambila ne twètù basakidile dîyì dimwe, anyi buumushile Dìyì dimwe, cyetu citupa nebacyùmùshè ku Mukanda wa Mwoyi, Bwakabuulwibwa 22.18, nshapita wa ndekeelu wa nkomeni awu.

⁴⁰ Ku cibangidilu menemene, Mukanda wa kumpala wa Bible, Nzambi wakabambila bwa kabatupi ku Dìyì dya Cyôci aci nansha dimwe to, “Dìyì dyônsò didi ne cya kulamiibwa,” bavwa ne cya kwikala ne mwoyi ku Dìyì adi. Yesu, munkaci mwa Mukanda, kulwa kadi kwamba mu Cyende cikondo, wamba ne: “Muntu kaakwikala ne mwoyi anu ku dyâmpà nkaayaadi to, kadi ku Dìyì dyônsò didi—didi dipatuka mukana mwa Nzambi.” Ne mu cikondo cya nkomeni cya Bwakabuulwibwa, mbadyanjile kutwambila, ne: “Ewu yônsò wùmushila Dìyì dimwe ku Mukanda, anyi waKusakidila dîyì dimwe, cyende citupa nebacyùmùshè ku Mukanda wa Mwoyi.”

41 Ke bwa cinyi kakwena mwa kwikala kantu nansha kamwe kaa kaa kabwucidile to, anu Dîyi dya Nzambi dilelela, kadiyi disambakaja to! Ke bânà baa balume baa Nzambi mbaabu, ne bânà baa bakaji baa Nzambi, kabayi balediibwe ku diswa dya muntu, anyi ku dilabulangana dya ku cyanza, anyi ku mushindu kampanda wa dibatiiza nansha; kadi balediibwe mu Nyuma wa Nzambi, ku Nyuma Mwîmpè, ne Dîyi diikale didimweshila Dyôdi diine kudibo. Ke Dimiinu dilelela dya Nzambi ndyadi!

42 Mwena lukuna udi udyenza mwena ekeleeziya kadi kushaala mulondi wa dikema wa ngiitabuujiu ya kale mu twitabaayi kampanda anyi mu cintu kampanda. Kadi kî ng'aci... Ke dipangakanangana ndyadi, cintu cyônsò cidi cipangisha bwenzeji bwa Dimiinu dilelela dya Nzambi abu!

43 Kadi tudi bamanye bishi? Tudi twamba ne: “Ee, bôbò, nudi ne bukenji bwa kuDyumvwija anyi?” To, mukalenge! Muntu nansha umwe kêna ne bukenji bwa kuumvwija Dîyi dya Nzambi to. Yêyè ke Mudyumvwijidi wa Yêyè mwine. Yêyè udi ucilaya, pashiishe Ucyenza, ke dyumvwija dyaci ndyadi. PatuYe muCilaye, pashiishe Yêyè uCikumbaja, ke dyumvwija dyaCi ndyadi. Cyônsò cidi cibegangana ne Dîyi dya Nzambi ndipangakanangana! Kakuyi mpatà nansha!

44 Mpindyewu, anu mûngambi ne, Yudaasa kavwa ne diitabuuja dya bushuwa to. Uvwa ne diitabuuja dya budingibudingi. Uvwa ne dii—diitabuuja dya udicinkila ne civwa m'Mwânà wa Nzambi, kadi kayi mumanye ne m'Mwânà wa Nzambi to. Nunku kavwa mwa kwikala mwenze bwalu abu to. Ne muntu wâdya cibanga pa ne Dîyi dya Nzambi edi m'Bulelela, udi ne diitabuuja dya budingibudingi. Musadidi mulelela wa Nzambi neashaale mukûlâme anu ku Dîyi adi.

45 Diloolo kampanda kuukaadi ndambu wa matuku, mwambi kampanda, wa mu Arizona, wa mu cilongelu cinene, cidi cyende luumu muneemu mu cimenga emu, mmulwe kûndi wamba ne: “Ndi—ndi muswe nkulongolole pa kaabwalu kampanda” (Mêmè kwamba...) “pawapeta mpunga.”

Mêmè ne: “Mpunga mwîmpè menemene ûndi mumanye ke yêyè ewu. Lwâkwaku.”

46 Ke kulwaye, yêyè ne: “Mukalenge Branham, wêwè udi uteeta...ndi ngela meeji ne udi ne meeji matooke ne wa kweyemena, kadi udi uteeta kuleeja baa pa buloba Dilongesha dya bapostolo.” Ke yêyè ne: “Cikondo cya bapostolo cyakajika ne bapostolo.”

47 Mêmè ne: “Cintu cya kumpala cîndi njinga kukukonka, wêwè mwaneetu wanyi, udi witabuuja ne Dîyi dyônsò dya Nzambi ndisonsola anyi?”

Yêyè ne: “Eyowa's, mukalenge, ndi nciitabuuja bushuwa.”

48 Mémè ne: “Pa nanku, udiku mufwanyine kundeeja mu Diyì mwaba udi cikondo cya bapostolo cijikile anyi? Mpindyewu, wêwè mundeeje mwaba udici cijikile, nêngitabuuje mumwe neebe.” Ke mémè ne: “Mufundi wa cikondo cya bapostolo, yêyè mene uvwa ne nsapi ya Bukalenge awu, mu dituku dya Mpenta dyakabwejiibwa cikondo cya bapostolo adi, baakamba ne: ‘Balumyana ne bânà beetu, tudi mwa kwenza cinyi bwa twêtù kusungidiibwa?’ Yêyè kwamba ne: ‘Nyingalalaayi, muntu ne muntu wa kunudi, nubatiijiiibwe mu Dîna dya Yesu Kilisto, bwa dilekelediibwa dya mpekaatu, nenku nenupete kupà kwa Nyuma Mwîmpè, bwalu mulayi udi bwenu nwênù ne bwa bânà beenu balela, ne bwa bônso badi kule, mu bûngi bwônso bwabiikila Nzambi wetu abu.’ Mpindyewu, mmunyi mudi Diyì mwa kwamba Maalu abengangana?”

Muntu awu ne: “Cimpumpu cikole ncinkwate diloolo edi.”

Mémè ne: “Ngela meeji ne udi wambilamu.” Nwamonu anyi?

49 Mpindyewu ngambilaayaaku, Nzambi ucidi ubiikila anyi? Piikala Nzambi ucidi ubiikila, nanku’s cikondo cya bapostolo cicidi anuku. Cya bushuwa! Mu bûngi bwônso bwabiikila Mukalenge Nzambi wetu abu, budiye ubiikila abu, bwabiikilaye abu, bûngi bwônso bwabiikilaYe abu, neciikale anu cikondo cya bapostolo, bwalu Yesu Kilisto udi umweumwe awu makeelela, leelu, too ne kashidi.

50 Mpindyewu, tudi tusangana leelu ne dipanganangana edi mbadimyamine mu cikondo ne cikondo cyônso. Bu nanshà ne bivwa mwa kwenzeka bwa twangate bwalu ebu mu tusunsa dikumi anyi dikumi ne tutaanu tudi tulonda etu, mwwa mwa kucyenza, kadi kakwena mu shinda to. Mu bikondo byônso... Twêtù bônso, bàabûngi baa ku twêtù bônso aba tutu tubala Bible. Nenku mpindyewu bu paakalwa Yesu, ne kusanganaYe dipanganangana adi, dibengangane. Yêyè uvwa Dîyì dimweneshiibwe, Uvwa dyumvwija dya Nzambi dya Dîyì, bwalu Yêyè wakamba ne: “Kenketaayi Mifundu, bwalu mu Yôyi mmunudi nwela meeji ne nudi ne Mwoyi wa Cyendelelele, kadi yôyi’s ke idi imfidila bujaadiki.” Ke bwalu abu’s. Yêyè—Yêyè uvwa dyumvwija dya Dîyì. Nenku mwânà wa balume ne wa bakaji yônso wa Nzambi wa cikondo eci mulediibwe cyakabidi udi dyumvwija dya Dîyì. Nudi mikanda mifundilangana, ibadiibwa kudi bantu bônso. Eyo.

51 Monaayi, Yêyè wakamba ne: “Badi baNkuukwila cyanaana, balongesha dipanganangana bu ne ke Dilongesha. Badi baNkuukwila mu cijengu, balongesha dipanganangana bu ne ke Dilongesha, dilongesha dya bantu, twitabaayi ya bantu, balongesha biine abi bu ne n’Dîyì dya Nzambi, paabi kabiye ne dipetangana nansha dya kânà ne Dîyì dya Nzambi.”

52 Tangilaayi, cikondo cyônso cididipatula dinowa dya mushindu awu, cikondo cyônso ncyenze nanku, ne cyetu eci

kacyena ne paa kubingila to. Tudi ne cintu cimwecimwe aci, ne cikondo cinene citambe bikwabo bikondo byònsò bisanga, bwalu eci ke nkomeni wa maalu malonda a buloba ebu. Dipangakanangana dya dinene dya kacya pa buloba ebu ke dyôdi edi, didi panshi paa buloba leelu ewu. Dipangakanangana mu bikondo bikwabo divwa dibakoka dibuumusha kudi Nzambi mulelela ne udi ne mwoyi, dibatuma ku mpingu. Leelu ewu, Yesu mmwambe mu Maataayi 24.24 ne divwa mua kwikala ditambe kufwanangana, mu mushindu wa difwanyine kuseeswisha ne Basungula biine bu ne bivwa mwa kwenzeka. Nwakula peenu bwa dipangakanangana! Kaa, mbya budimu be. Sataana udi munkaci mwa bantu, mwikale muntu mumanyine maalu a Nzambi mu tulaasa, Mulongeshi wa cikunda mu Bunzambi webe wa eyo, mukumbane kulongesha Dîyî adi byamba kwikala bipwangane. Ke mwakamba Yesu. Kadi anji mujoojaayi numone, neikaleku mwaba kampanda. Neãbè ne: “Ee, mpindyewu, aci kacivwa bwa eci to.” Kaa, eyowa’s, mbwa eci kabidi, nwamonu’s, bwalu, Nzambi ngwákamba ne divwa ndyôdi.

⁵³ Tangilaayi cyakenzadi. Dipangakanangana dimwedimwe adi dyakatwala cijji cyaNzambi mu matuku a Noa, paakatuma Nzambi muprofeta Wende ne kuyiishaye bu kapya kalakuka, wambila bantu bwa kunyingalalabo, ke dipangakanangana kutukijibwadi mu mâyi. Pashiishe cyakenza Sataana ncinyi? Kumba kulondaye paanyima, mu Ham, e kuditwaye anu mu dimyamina cyakabidi dyôdi adi. Ncya bushuwa menemene.

⁵⁴ Pashiishe Mòsà kulwaye, muprofeta munene, bwa kupatula bâna baa Izaleela mu cipeela. Cyakenzeka ncinyi? Mòsà, muprofeta munene wa Nzambi, ubatwadila Bulelela bwa kabuyi dyela mpatà, Bulelela bushindika. Yèyè ukaavwa mutuutakeene ne Nzambi. Nzambi bujaadika ne yèyè uvwa mutuutakeene Nende. Mushindu mwine uvwa bantu abu kuntu kwine aku, baakwidi abu, biikale ne yabo ntendeelu, ne yabo mishingà, ne yabo mikiiya ne byònsò abi, kadi Mòsà yèyè wakiimana bu dishindika dya dyumvwija dya Dîyi. Kanupu aci mwoyi to! Mòsà uvwa dyumvwija dya Nzambi dya mulayi Wende. Yèyè ngwákamba ne neàcyènzè; yèyè ke uvwa dyumvwija dya Nzambi.

⁵⁵ Cyakenzeka ncinyi? Ekeleeziya ucivwa anu ubangilaku dipatuka mu Ejipitu, bende lwa makàsà ndambu wa matuku, kadi cyakenzeka ncinyi? Sataana kulwa ne dipangakanangana dyende mu muntu ewu, Kaayina mwibîdi ewu, uvwa mwikale Baalama, ke kumyaminaye dipangakanangana munkaci mwabo. Tudi bamanye ne aci ncya bushuwa. Baalama awu, dilongesha dya Baalama adi, dya ne “tudi bònsò bamwe, tudi tukwacila Nzambi umweumwe unudi peenu nukwacila mudimu awu,” bwa mudibi bifundiibwe, uvwa wamba cya bushuwa, bwalu wakalambula mulambu uvwa Nzambi ulambula; bimpanga bya mikooko mwandamutekete, bimpanga bya ngombe

mwandamutekete pa byoshelu mwandamutekete, usambila Nzambi umweumwe awu ne bupwangane bwònsò anu muvwa Mòsà usambila pende mwamwa mu cipeela amu, mushindu anu umweumwe menemene. Kadi kabavwa bamwe to! Bituleeja mu cimfwanyi ciwva mwa kulwa kwenzeka. Mwaba awu, cyakabidi, kuvva Kaayina awu mumweneshiibwe mu... mu muntu ewu Baalama. Kadi mwamwa muvwa Nzambi awu mumweneshiibwe mu muntu awu Mòsà, uumvwijila Mèyi Ende mu muntu, udimanyishila Yèyè mwine, mulayi Wende, mu muntu. Ke dipangakanangana kujuukadi.

⁵⁶ Ke mwakenzadi kabidi cyôci aci mu cikondo cya Yudaasa, ke yèyè awu kulwaye ne dipangakanangana dyende.

⁵⁷ Nenku, vulukaayi ne, mpekaatu ewu wâkiitabuujâbo kudi bantu abu awu, wa ne “tudi bònsò bamwe, tudi tukuukwila Nzambi wa mwomumwe, bivwa bikengela twètù bònsò kwikala beena ekeleeziya umwe, bivwa bikengela twètù kwikala cisamba cimwe,” mpekaatu awu kabakamufwila Izaleela luse to! Yesu wakamba, Yèyè mwine ne: “Mbafwe bònsò!”

⁵⁸ Baakabutuka, bònsò pa kuumusha basatu baa kudibo. Abu ke baakananukila ne baakitabuujâ mulayi. Paakamba bantu baa tulendalenda abu ne: “Katwena mwa kukwata buloba, mbikole be bwetu twètù,” ne bikwabo, Kaaleba ne Yoshuwa baakapuwisha bantu abu, kwambabo ne: “Twètù tudi batambe ne bukole bwa bukukwata, bwalu Nzambi ngudi mutulayebe! Nansha dikandameena diikaleku dya mushindu kaayi!”

⁵⁹ Ne twètù tucidi anu mwa kuyiisha dyondopa dya kudi Nzambi, ne dibatiiza dya Nyuma Mwimpè, ne tucidi anu ne bukole bwa Nzambi bwa kututapulula ne bintu bya pa buloba. Nzambi ngudi mwambe! Cikondo cya bapostolo kacituku cijike to, ne cyôci ciine kacyakujika to, cidu anu citungunuke.

⁶⁰ Pa nanku, nyewu tusangana mummyaminyi umweumwe wa kale wa dipangakanangana awu. Nenku vulukaayi ne, mpekaatu awu kaakafwidiibwaku luse nansha. Mpindyewu, mwaneetu, piikalabi ne kaakafwidiibwaku luse ciine cikondo aci to, twambè bishi bwa mpindyewu udi di—dimiinu dilelela dya bikondo byònsò diikale munkaci mwa kudisanga ewu?

⁶¹ Monaayi cintu cinene cyakenza Baalama eci, cyakaya cyenda citungunuka anu kutungunuka, ne ndekelele wa byònsò cyakashiikila mu difika dya—dya Yudaasa Mpongoloki, ne Yesu. Cwva ncinyi? Yudaasa ne Yesu bavwa anu menemene cimfwanyi cya Kaayina ne Abele. Bwalu, anu muvwa Yudaasa mutendeleedi amu, ke muvwa kabidi Kaayina mutendeleedi. Kaayina wakaasa cyoshelu, kulambula mulambu, kukuukwila Nzambi, mwikale ne meeji matooke ônsò mu cyôci aci anu muvwa mukwende awu. Kadi, nwamonu's, kavwa yèyè mupete dibuulula dya ciwva Dìyi to. Uvwa yèyè udyambidila ne Adama ne Eva bavwa badye bimuma bya pommes

anyi cimuma cya mushindu kampanda. Kadi Kaayina... Abele, ku dibuulula, wakamanya ne aci ncyà mafi; mashi ke akabapatula, ke yêyè kulambula mwânà wa mukooko. Ke Nzambi kufidilaye mulambu wende awu bujaadiki ne uvwa mwakane. Ke kukwacikaye mukawu ne kukebaye bwa kushipa mwanaabo. Nenku anu mwakashipaye mwanaabo pa cyoshelu cimwecimwe pavwa mulambu wende mufwile, mwânà wa mukooko mufwile pa cyoshelu, bya mwomumwe kabidi Yudaasa Mpongoloki wakatungila Yesu Kilisto pa cyoshelu cya Nzambi, ne wakaMushipa anu muvwa Kaayina mushipe Abele. Bwalu, Kaayina uvwa dimiinu dya dipangakanangana.

⁶² Ke mwakadi Baalama kabidi, muprofeta wa difutu awu, muntu uvwa ne cya kwikala mumanye bîmpè bya menemene. Wa bwalu Nzambi mumudimwije ku bimanyinu ne maalu a kukema, ne kampundu kiine kaakula mu myakulu myenyi, kadi nansha nanku yêyè kuya anu kuya. Wakalediibwa bwa kwikalaye mu—mumyaminyi wa dipangakanangana.

⁶³ Nenku piikalabi ne Yesu wakadyanjila kwamba ne cikondo eci necikajikile ku diikala dipangakanangana dya ditambe bunene dya kacya, cikondo cya ekeleeziya wa Laodikiya, wa civumvu, udi muMwipate mu ekeleeziya, mmunyi mudibi mwa kwikala cîngà cintu cidì kaciyi dipangakanangana adi! Cya bushuwa, ndyôdî. Didi dikajikila mu cikondo aci.

Nenku civwa n’Kaayina ne Abele cyakabidi ku Kalvariyo.

⁶⁴ Mpindyewu monaayi, anu bu kwônsò eku, Yesu mmwenze anu uya, ubwela mu Dyulu, Nyuma Mwîmpè pende utumiibwa. Ke civwa Dimiinu aci, Mufidi wa Mwoyi ku Diyî, bu mutuvwa bambe makeelela diloolo. Ke Yêyè awu udi ufuululula Dîyî. *Kufuululula* mbwena kwamba ne “kuvwija ne mwoyi.” Nyuma Mwîmpè mulelela udi uvwija anu Diyî didiYe adi ne Mwoyi. Kaakuvwija twitabaayi kampanda ne Mwoyi to, Kêna mwa kucyenza to, bwalu kênàku ne cya twitabaayi mu Yêyè to. M’Mwoyi wa Diyî dya Nzambi, bwalu Yêyè udi Nzambi. Nwamonu anyi? Nenku Yêyè ngudi ufuululula Mubidi awu.

⁶⁵ Mpindyewu monaayi, bu mwakenzabo. Nenku, ne Bible mmwambe, ne—ne Yone wakaakula ne bânà bende wamba ne: “Bânà bakese, nukaadi bumvwe bamba bwa mufwilakanyi ne Kilisto uvwa ne cya kulwa pa buloba,” ne, “ne yêyè mwine ukaadi pa buloba, ne udi ukwata mudimu mu bânà baa cishiku.” Mpindyewu, aci civwa bu bidimu makumi asatu nanku awu paanyima paa difika dya Nyuma Mwîmpè. Tudi tusangana ne, paakalwa Nyuma Mwîmpè, Dimiinu dya bushuwa adi, Mufidi wa bushuwa wa Mwoyi kudi Dimiinu, pashiishe ke dipangakanangana didi dibwela cyakabidi edi. Nenku monaayi, ke kutungunukadi. Divwa ne. . .

⁶⁶ Diyî dilelela dikaavwa dimane kushindikiibwa, baprofeta baa kale abu bakaavwa bashindike ne Diyî dya Nzambi

divwa Bulelela pavwabo benda bashiilangana apu. Muntu yèyè anu mubale *Nsangilu wa Nicée* anyi *Nsangilu wa Kumpala kwa Nicée*, matuku dikumi ne ataanu a cididi cya mashi awu, paakaswa musumba wa beena Loomo awu kuntwaku kubweja ne kuvwija ekeleeziya awu dingumba. Baprofeta baakalwamu, badijingile biseba bya mikooko, badya bisoosa, kadi kwimanyinabo Dìyì adi! Kadi cyakenza cinyi? Byakakengela biikale bu Kaayina, byakakengela biikale bu Abele, bikengela umwe afwe. Cya bushuwa, ke mwakenzekabi. Ke Dìyì kujimijadi bwenzeji Bwadi munkaci mwa bantu, ke bônso kwela tukanda babenga Dìyì dilelela ne kubwejabo bilele biswika bya dipangakanangana dya ekeleeziya wa Katolike wa kumpala. Kusakidilabo paapà, kusakidilabo mwepiskopo, kusakidilabo *bikampanda*, *bikansanga*, ne *bikankenga*. Kuumushabo dyumvwija dilelela dya Peetelo, ne dya—dya—dya Mariya, ne—ne bikwabo bidi bishaale; ke kwenzabo mpingu, nenku cyakenzabo kacivwa cingà cintu to anu dyenza dya mishingà ya bampanganu myangata mu ntendelelu wa cyena Kilisto cya mukana aci awu. Civwa ncinyi? Dimiinu dya dipangakanangana! Ke kudyzenzabo bulongolodi, kudyzenzabo bulongolodi, bwa musangu wa nzànzànà pa buloba ebu, ekeleeziya. Civwa ncinyi? Dimiinu adi dya dipangakanangana dyàkabangà kumyamina, kantu kampanda kasakidila, kuumushila.

⁶⁷ Nganyi ukaadiku muumvwe, mu Bible, ne kabeena mwa kudya munyinyi mu ditànù? Nganyi ukaadiku muumvwe, mu Bible, cintu paaci ne nkumyaminangana kwa mâyi pamutu paa kubatiiza, kwinyija mu mâyi? Nganyi ukaadiku muumvwe bintu bya mushindu awu ne, “Mwoy’awu, Mariya,” anyi cintu kampanda? Nganyi ukaadiku muumvwe bimwe bya ku bintu bibole bya budingidingi bya beena Mishònyì aba ebi, bôbò paabo? Lwesu lwa mishila kalwena mwa kupenda mbidika wa diipikila café mudiye mulamate mafuta pambidi to. Cya bushuwa! Cidi anu ne, mulake nsupu mmudye! Nganyi ukaadiku muumvwe Nzambi ukwataku mudimu bu bulongolodi kampanda? Anji ndeejaayi musangu nansha umwe ukaadiku umwepele mudyènzè bulongolodi kadi kushaala ne mwoyi. Ivwa ifwa dyakamwe, kayiciyiku mwa kujuuka kabidi to! Dìbà dyàkànyì dya cintu kampanda kwenzekaci, dìbà dyàkànyì dya Nzambi kukwataye mudimu. Ncishipe bwenzeji munkaci mwa bantu.

⁶⁸ Cintu cimwecimwe aci ncyenjiibwe leelu ewu. Badi bashipa bwenzeji, bamba ne: “Kaa, musumba wa babunguluki baa mu malaba wawa, kabayi ne cya ndolo cidibo naaci.” Nenku, mona’s, s’ndipangakanangana adi! Tangilangana ne Dìyì mpala ne mpala kadi umone ne Dyôdì adi didi cinyi, umonebi ne Nzambi udi uumvwija Dìyì Dyende Yèyè mwine. Nzambi mmukumbane bwa ku mabwe aa kujuudila Abraham bàna. Amen.

69 Dìyì dikaavwa dishindikiibwe dyònsò kudi beena Kilisto baa ku cibangidilu abu, mushindu wakabasungila Nzambi ku bintu byònsò, ne ku masaama, nenku bavwa ne baprofeta, bavwa baakula mu myakulu, bayandamuna, bafila mikenji ya ciprofeta ivwa ijaadikiibwa misangu yònsò ne ivwa anu bulelela bwa menemene. Kadi Dìyì dishindika dimweneke anu bilenga, bantu kwela tukanda bwa kuDibenga, kusungulabo dingumba. Kadi's ke mamwëndè wa malongolodi ònsò nyawu.

70 Ònsò akaadi mabobe mapwile mpindyewu. Akaadi cyakabidi mabange kukwama mamiinu. Dikaavwa difwe, kadi dyòdi kwela cyakabidi bilongo mu matuku a Luther, bu mutudi bamanye ku diyiiisha dya musangu mushaale mwaba ewu mu didya dya mu dinda. Dyòdi kwela bilongo mu dituku dya Luther. Mpindyewu cyakenzabo ncinyi? Mbenze anu muntu munene awu ufwa, bôbò kwenza bulongolodi.

71 Dyòdi kwela bilongo. Cyakabidi mu matuku a John Wesley, pavwa ba-Anglicans abu, ne biine byabo bya dikubiibwa dya cyendelele abi ne byònsò bivwa biciswike kaaba kampanda mu mushindu wa bambe keela makàsà mu universalisme, kadi cyakenzeka ncinyi? Nzambi kujuula muntu uvwabo babiikila ne John Wesley, kadi kushipaye cintakanyi cyònsò aci. Kadi mmwenze anu ufwa, yêyè ne Asbury ne bakwabo, cyakenzeka ncinyi? Kudyenzabo bulongolodi, nenku patudi twakulangana apa nukaadi ne ba-Méthodistes baa mishindu ne mishindu. Ke pashiishe kulwaku umwe anyi mukwabo, Alexandre Campbell, John Smith, ne bakwabo nî mbanganyi apa.

72 Ndekeelu wa byònsò, ke Mpenta udi ubwayika ewu, upatukila mu byònsò abi. Cyalu kwenzeka pashiishe ncinyi? Bavwa banyeema anu bîmpè, cyalu kunupangisha ncinyi? Nudi baalukile buludi mu bitoci bimwebimwe munuvwa bapatuke amu, baalukile buludi mu mâyi a bucyafu amweumwe awu, baalukile ku dipangakanangana ne ku dyenza dya malongolodi, bikengela nudyangane mukana pa bidi bitangila Dìyì. Nenku misangu yònsò ivwa Nzambi mwa kutuma cintu kampanda cipyacipya, kanuvwa mwa kucyakidila to. Neya bushuwa! Dipangakanangana cyakabidi! Nenku, monaayi, anu mûmvwà ngamba dituku adi, kazubuzubu kakese kaa kumpala kadi kafumine ku muji ewu aku, kadi kabandila mu mabeji ne kabandila mu mwepu, pashiishe kaalukila cyakabidi mu cikolakola, kadi kupatuka. Kazubuzubu kakese kaa blé aku nkambe kufwanangana ne lutete lwine, ne twètù tuvwa tudyambidila ne ndwòlù, kadi paudi ukapanda, kamwena lutete nansha lukese to. Kadi anu kambudi cyanaana bwa lutete lukolelemu, ne kòkò kadi kafwa kabidi, ne mwoyi udi upatakamu dyakamwe ne ukabwela mu lutete alu. Monaayi, ke mudibo babiikila ekeleeziya idi mimyamine . . .

73 Tudi tujandula leelu ewu ne ekeleeziya yetu ya mènà eyi, mene too ne ku yetu ya beena Mpenta, tudi bapatuke,

katuvwa mwa kwikala basankishiibwe to, kukengelabi bwa twètù kwenza twetu tusumbu twa sungasunga. Bintu byònsò bijuuka, bikengela twètù kwikala ne *cikampanda*, bikengela twikale ne *cikansanga*, bikengela twikale ne kasumbu kakwabo. Nenku ewu mulumyana ujuuka, wamba ne: “Ulwalwa pa ditutu ditooke.” Mukwabo pende ne: “Uh-huh, Ulwalwa pa kabalu katooke.” “Eyo, netwènzè tusumbu tubidi.” Nwamonu’s, ncinyi ciine aci? Dimyamina dya dipangakanangana! PaalwaYe piine apu, cyònsò ciikalaku aci, Yèyè neumvwije Dìyi Dyende Yèyè mwine paalwaYe. Twètù twindilaayi too ne pa diine dībà adi. Umvwayi. . . Panudi nwakula pa biine abi, kanwena nansha numvwa Mukenji wa dituku to. Nudi nufunkuna misangu yònsò anu ku ciikala Nzambi mwa kwenza, anyi ku cikaadiYe mwenze, kadi bapange kumanya cidiYe munkaci mwa kwenza. Mushindu awu ke utudi tubwejamu dipangakanangana.

⁷⁴ Mpindyewu tudi tumona leelu ewu ne ekeleeziya yetu, ekeleeziya yetu yònsò—yònsò mmimiyamine lupepele, ne ikaadi inowa mvunda. Katucyena ne masangisha a milombo to, katucyena twenza masangisha atuvwa ne ciibidilu cya kwenza to. Mbwalu kaayi abu? Tukaadi balekelele biibi bwashi mu byònsò. Tangilaayi, nansha ku ekeleeziya yetu ya beena Mpenta miine, ikaadi myùle tente ne bakaji badi ne nsuki mibebula. Aci kacivwaku cyanyishiibwe pa ciibidilu nansha. Kwìsù kulaaba bilaabu, nzadi milaaba ine, bintu bya mishindu yònsò; upeta muntu mulume pambelu apa ne. . . byenze bu ba-Rickys ne bikwabo; mubwele mu dibaka misangu isatu anyi inaayi, ne biine abu biikale balami; kaa, dipangakanangana kaayi’s we! Mbukooya! Badi babyenza bishi? Nzambi kî mmuswe kwikala naabi mu Ekeleeziya Wende to, bikengela baye ku bulongolodi kampanda bwa kubwelamu. Muntu uciina bwa kwamba bwalu kampanda pa bidi bitangila maalu aa, bwalu mbafwanyine kumwipata mu bulongolodi amu. Nzambi, tupeesheku bantu badi kabayi baswikakane ne cintu nansha cimwe to pa kuumusha Nzambi ne Dìyi Dyende, biikala mwa kwamba Bulelela pa byòbì abi. Ke cidi citukengela menemene ncyaci. Citukaadi twètù benze ncinyi? Bamyamine dipangakanangana. Tudi bamyamine mpepele, kadi mpindyewu tukaadi tunowa mvunda.

⁷⁵ Monaayi ne bakaadi mpindyewu basangishiibwa kaaba kamwe bwa kwoshiibwabo. Nukaavwa bamone ne, Yesu mmwambe ne: “Dyambedi, lusangishaayi kaaba kamwe, nuluswike tusumbu tusumbu, pashiishe nwèlè tusumbu twònsò atu mu mushiki umwepele, kadi ndwe kulwosha.” Kudi kasumbu kakese bakabiikila ne Méthodiste, Baptiste, Presbytérien, Luthérien, bònsò abu badi badisanga kaaba kamwe mu Nsangilu wa Maekeleeziya wa Buloba bujima. Ncinyi aci? “Lusangishaayi dyambedi!” Aleluuyah! Nukaavwa bamone ne, Yèyè udi usangisha lupela dyambedi, uluseemeja kule ne blé, ubitapulula:

“Lusangishaayi kaaba kamwe kadi nùlwòshè.” Badi ne cya kwoshiibwa bônso ne manyooka a Nzambi, bwa dimyamina dya dipangakanangana munkaci mwa bantu, bintu bidibo . . . Biikale ne mmwenekelu wa difwana dya Nzambi, kadi biikale babenga kwitaba Bukole bwadi, babenga kwitaba Dîyì, anu bwa kwikala bakwate ku mikiiya kampanda ya ntendeleelu, ya bilele biswika bidi muntu kampanda mubwejemu, uteeta bwa kubyela mu Dîyì dya Nzambi. Kabyakukumbana to. Ndipangakanangana.

⁷⁶ Ndi ngela lubila leelu ewu, bu muvwabi, muprofeta munene wa kalekale wawa, Amosa, paakapwekaye e kubwela mu cimenga aci, kwambaye ne: “Ncyèna muprofeta to, anyi mwànà wa muprofeta. Kadi ntambwe yèyè mukungule, wabenga kukwacika bwôwà ke nganyi?” Kwambaye ne: “Padi Nzambi wakula, wabenga kwamba ciprofeta ke nganyi.” Uvwa uduyanjila kwamba dinyooka pa lukongo alu, wamba ne: “Anu mwine Nzambi unudi nulaka mukana nwamba ne ngunudi nukwacila mudimu awu ke wanubutula.”

⁷⁷ Fundaayi eci, cidi pa mukaba wa mēyì, ne nwikale bavuluke. Anu mwine Nzambi udi . . . Bantu aba badi mpindyewu munkaci mwa kudisanga bônso mu dinowa dinene edi dya—dya Nsangilu wa Maekeleeziya wa Buloba bujima, ne nenwikale ne cya kumubwela. Kanwena mwa kushaala pambelu pende to. Anyi wèwè bu muntu nkaaya neupatukemu, anyi neubwelemu. Kakwakwikala mwaba wa nkacinkaci to. Neciikale cimanyinu cya nyama wa lwonji. Kakwena muntu mufwanyine kusumba anyi kusumbisha, pa kuumusha ewu udi ne cimanyinu aci, anyi udi ne dipangakanangana. Mpindyewu, shalaayi pambelu paa cyôci aci! Patukaayimu! Cinyeemaayi! Shaalaayi kule naaci! Nzambi mwine udibo balaka mukana bamba ne ngudibo bakwacila mudimu awu ke wababutula. Nzambi munene wa dinanga awu wîkala kayi mwa . . .

Bavwa bamba ne: “Ee, Yesu’s wakasambila bwa ne bivwa bikengela twètù kwikala umwe.”

⁷⁸ Pashiishe Yèyè wakamba kabidi ne: “Mmunyi munudi mwa kwendela pamwe, babidi bendela pamwe, piikalabo kabayi bapunge dîyì?” Wakamba ne “umwe,” mudi Yèyè ne Taatu biikale Umwe. Ne Taatu uvwa Dîyì, ne Yèyè uvwa Dîyì dimweneshiibwe. Yèyè uvwa “Umwe” ne Taatu, bwalu Yèyè uvwa dimweneshiibwa dya Dîyì dilaya dya Nzambi. Nenku ke mudibi kabidi leelu ewu, anyi dituku dikwabo dyônso. Eyowa’s, mukalenge. Nzambi awu udi Umwe. Mmuswe twètù twikale umwe.

⁷⁹ Mmunyi mudi ewu mwa kwikala umwe, ewu mwikale ubenga kwitaba dilediibwa dya kudi virgo, ne ewu kayi witaba, ubenga kwitaba dyondopa dya kudi Nzambi, ne cikampanda, cikansanga, bwônso bwabo biikale mu cimvundu cya mushindu awu? Bamwe baa kudibo kabayi nansha biitabuuja Nzambi to,

kabayi biitabuuja ne Yèyè uvwa Mwânà wa Nzambi to; biikale biitabuuja ne Yèyè uvwa mwânà wa Yozefu, *ubikidiibwa* ne m’Mwânà wa Nzambi. Cya bushuwa. Dipasa dya ba-Luthériens, beena Zwingly, batu biitabuuja cyôci aci, ne Yèyè uvwa anu muntu wetu wa mwîmpè ewu. Beena Science Chrétienne mbambe bôbò ne Yèyè uvwa muprofeta, anu muntu wetu wa patupu ewu, ne Yèyè kavwa Nzambi to. Mona’s, piikalabi ne Yèyè kavwa Nzambi to, Yèyè kadi ke museeswishanganyi munene utu baa pa buloba kabayi banji kupetaku kacya to. Anyi Yèyè uvwa Nzambi anyi Kavwa cintu ciine to. Uvwa Nzambi! Uvwa Bunzambi, Yèyè mwine, bwandamuke mubidi munkaci mwetu, mu mupersona wa Mwânà wa Nzambi. Cya bushuwa, ke civwaYe.

⁸⁰ Mpindyewu tudi tumona ne dipangakanangana ndibwele. Tudi bamanye ne didi mwaba ewu, kakwena muntu nansha umwe udi mwa kuvila aci to. Kaa, ekelekele! Monaayi anu cyanaana. Yèyè neabutule musumba udi ulaka mukana wamba mudiwu ukwacila Nzambi mudimu awu. Tangilaayi bwalu abu.

⁸¹ Nzambi mmukune Dimiinu Dyende. Nkaadi njikija, bwalu dîbà dyākànyì dya kubanga mulongo wa babeedi. Nzambi mmukune Dimiinu Dyende, ne Dimiinu Dyende n’Kilisto. Nênyiiishe pa bwalu abu dîngà diloolo, mwaba udi Nzambi mwangate dipangadika dya kuteeka Dîna Dyende, Mukalenge mwanishe, pâmwâpa mu didya kampanda dya mu dinda pângikalà mupete kabidi dîbà. Monaayi, Yèyè ke Njila umwepele wa dipandukila. Yèyè ke Mukookeshi mulelela umwepele. Yèyè ke Nzambi mulelela umwepele, kakuyi mukwabo to pa kuumusha Yèyè. “Mêmè ke Nzambi, ne Nzambi nkaayaanyi,” mwakambaYe. Yesu wakamba ne: “Dîyì dituma ndeyi: Teelejaayi, Nwênù Izaleela, Mêmè ke Mukalenge Nzambi wenu, Nzambi anu umwepele. Mêmè ke Yèyè awu. Cinudi nukebela mukwabo ncinyi? Mukwabo nealwe. . . Ndi mulwe mu Dîna dya Taatu Wanyi, kadi kanwena nuNgakidila to. Kadi mukwabo nealwe mu dîna dyende yèyè, nenku yèyè awu ke unwakidila.” Nenku ke cyakenzabo ku Nicée.

“Udi mwena Kilisto anyi?”

“Mêmè ndi Baptiste.”

“Udi mwena Kilisto anyi?”

“Mêmè ndi mwena Mpenta.”

“Udi mwena Kilisto anyi?”

“Mêmè ndi Méthodiste,” dîna dya cyanaana.

⁸² Kadi pakaadibi ne n’Dîna adi dya “Yesu Kilisto,” badi buumuka baseemena kule naaDi ne mwabo mwônso, kabayi baswe kwikala naaDi bwalu to, bwalu Yèyè n’Dîyì ne Dîyì ditu diditeeja Dyôdi diine. Monaayi, Njila umwepele wa dipandukila! Yèyè ke Rose wa Shalona, mudi Bible mwambe ne ke civwaYe.

Mwânzù wônsò (mu Bible) wa Nzambi ngwa Yesu Kilisto. Yêyè uvwa Alpha, Omega, Cibangidilu ne Ndekeelu; Ewu Uvwa, Udi, ne Ewu Ulwalwa; Muji ne Mutoloku wa Davidi, byônsò bibidi Muji ne Mutoloku wa Davidi; Mutooto wa mu Dinda, Rose wa Shalona, Mbata wa mu Cibanda, Alpha, Omega, Taatu, Mwânà, Nyuma Mwîmpè, byônsò mu Yesu Kilisto! Yêyè ke uvwa dimweneshiibwa mu kaabujima dya Yehowah Nzambi mwandamuke mubidi bwa kusòmba munkaci mwetu. Anu civwaYe menemene.

⁸³ Uvwa Rose wa Shalona. Bavwa benza cinyi ne Rose wa Shalona? Bavwa baMukama, baMuzaaza, bwa kupatulaMu manananshi. Cilongo cîmpè cya rose bidi bikengela bacizaaze bwa kupeta manananshi a ku cilongo aci cya rose. Ke civwa Mwoyi mulenga kumona, kakuvwaku mwoyi bu Wôwò awu to, kadi byakakengela kukama kuWukamabo ku Kalvariyo.

⁸⁴ Nwamonu's, bavwa bangata ma—maanyi a Rose wa Shalona kadi kuèla Aalona, bivwa bikengela kumwelabo maanyi a cyôci aci bwa kubwelaye kumpala kwa Mukalenge mu mwaba wa cijila, munda mwa cilâmbâ cikudika cya cijila. Bivwa bikengela kumwelabo maanyi a cilongo cya Rose wa Shalona, bwa kubwelaye bwa kumyamina mashi pa nkwasa wa ngâsà ku cidimu ne ku cidimu. Neku maanyi awu avwa ne cya kwikala pambidi pende, mupuuya wa dipembu dîmpè bwa Mukalenge, mwambule mashi a mwânà wa mukooko kumpala kwende, paanyima paa bamane kumumyamina pende miine mashi a mwânà wa mukooko. Tu-grenades ne tungonga tunyungulukile bilâmbâ byende, bivwa bikengela wenda wela bidya mushindu kampanda, twikale tudila twamba “wa cijila, wa cijila, wa cijila kudi Mukalenge.”

⁸⁵ Monaayi, Yêyè ke Rose wa Shalona awu, Mupuuya awu wa dipembu dîmpè awu, Maanyi pambidi paa cisamba Cyende. Kwêna mwa kulwa kumpala Kwende ne twitabaayi wa mushindu kana wônsò, ne cintu cikwabo kana cyônsò to, anu mwikale mulaaba maanyi a Rose wa Shalona awu, Dîyî. Yêyè ke udi kabidi Mbata wa mu Cibanda awu.

⁸⁶ Mpindyewu, udi upeta bwanga bwa opium bishi? Udi upeta bwa opium paudi wangata mbata kadi kumukama, upeta bwa opium. Bangangabuka batu benza nende mudimu mu bilambidi byabo bya manga. Angata muntu udi ne mutu munyunguluke ne mubinduluke, anyi muntu mukaji, mwikale udyumvwa bu ne ukaadi upaala mukupa, wenda wela mbila, udi wamba kuvuma ne ciiji, ngangabuka neangate ndambu wa bwanga bwende bwa opium wa mbata abu kadi kumutwa mu diboko anyi mu mujilu mwaba kampanda, anyi muntu mulume, udi udituuja. Bidi byanji kumujika byônsò bwa katanci. Kadi bwanga abu bwa opium budi bwenda anu bu bwamutenduku, bipita ne pavwabi.

⁸⁷ Kadi nya' nzwambila, balunda baanyi, aci cidi anu cimfwanyi cyanaana cya Bwanga bulelela bwa Opium udi ufumina ku Mbata wa mu Cibanda ûndi mêmè ewu mumanye. Yèyè ke Mbata wa mu Cibanda. Wakakamiibwa ku Kalvariyo. Wakatapiibwa mputa bwa kushipa kwetu kwa mikenji, ku mibundabunda Yende twâkondopiibwa. Mu aci, mu dikama dya bilongo adi, Yèyè uvwa Cilongo. Yèyè ke uvwa Cilongo cya citambe bunene cikaadiku citoloke, civwa m'Mbata ewu wa mu Cibanda, ne Rose wa Shalona munene ewu. Mpindyewu Yèyè awu mmukudika diloolo edi, mwalabaja eku ne eku pankaci paa Dyulu ne buloba, ngela meeji, Yèyè wakakudikiibwa, cikondo aci, nanku's we, bwa—bwa kuumusha mpekaatu wa baa pa buloba ne kupingajila baa pa buloba dyondopa. Ne Bible udi wamba ne Yèyè udi umweumwe awu makeelela, leelu, too ne kashidi.

⁸⁸ Mulunda wanyi, paakambila Nzambi Mòsà, mu cipeela, civwa nci—ncimfwanyi cya Yèyè awu, bwa kabandisha nyoka wa cyamu cya kabanda. Ne cyamu cya kabanda cidi cileeja mpekaatu mulumbulwisha, nyoka udi uleeja, *nyoka wa cyamu cya kabanda* udi uleeja “mpekaatu mumana kulumbulwisha.” Bu mudi, *cyamu cya kabanda* cidi “dilumbulwisha dya kudi Nzambi,” bu muvwa cyoshelu cya cyamu cya kabanda pavwabo bateekela milambu. Ne Eliya kabidi wakambula mèsu e kwambaye ne kuulu kuvwa kwenze bu cyamu cya kabanda, dilumbulwisha dya kudi Nzambi pa ditunga divwa kadiyi diitabuuja to diikale ditwe cimpinga dyumuke kudi Nzambi. Cyamu cya kabanda cidi cileeja dilumbulwisha, dilumbulwisha dya kudi Nzambi. Ne nyoka uvwa uleeja mpekaatu mumana kulumbulwisha; ne Yesu ke uvwa nyoka awu muvwijiibwe mpekaatu bwetu twètù, ne mwangate manyooka a Nzambi pambidi Pende. Wakatapiibwa mputa bwa kushipa kwetu kwa mikenji, muzaaza bwa bubi bwetu, dinyooka divwa bwa ditalala dyetu dyakapona pambidi Pende, ne ku mibundabunda Yende twâkondopiibwa.

⁸⁹ Kaa, Nzambi's udi ne birô Byende bya ngangabuka byûle tente ne bwanga bwa Opium, diloolo edi, bwebe wèwè. Mulunda wanyi mwena Kilisto, nyawu usaama ne utakanyika. Kaa, udi muzengele, bidi anu bikole be bwebe wèwè. Kucyena kabidi mwa kubitwala to, neu—neupaale mukupa mu dituku dya bwena leelu ditudi ne mwoyi edi.

⁹⁰ Nwafumu ku diteeleja *Life Line* diloolo edi, kwâmbîbo ne, ne—ne Russie udi wamba ne, mu '55 kamuyi mpatà to “bôbô nebangate bukontononyi bwônsò bwa buloba bujima”? Kumpala kwa aci kwenzekaci, Dyambwibwa didi ne cya kulwa. Nenku cikaadi pabwîpi mushindu kaayi, mulunda wanyi? Bidi pabwîpi apa menemene paa wela cyanza cifika.

⁹¹ Kwênàku muswe kuMukeba diloolo edi ne mwoyi webe wônsò anyi? Yèyè ke Mbata wa mu Cibanda, ne Yèyè udi

umweumwe awu makeelela, leelu, too ne kashidi. Yêyè udi mwab'ewu diloolo edi bwa kudibandisha Yêyè mwine munkaci mwa bantu Bende, anu mwakabandisha Môsà ci—cimanyinu cya mpekaatu, mulumbulwisha. Ne kacyi anu mpekaatu nkaayende to, kadi ne disaama. Vulukaayi ne, Yesu wakamba ne: “Anu mwakabandisha Môsà nyoka wa cyamu cya kabanda amu, bya mwomumwe kabidi Mwânà wa muntu neabandishiibwe.” Môsà wakamubandisha bwa cinyi? Bwa mpekaatu, bupidya, ne bwa disaama. Yesu pende, wakabandishiibwa, bwa mpekaatu, disaama, ne bupidya. Yêyè uvwa cintu cimwecimwe aci.

⁹² Mpindyewu, diloolo edi, mu miine matuku atudi bapete dipangakanangana dinene edi aa, Yesu Kilisto wakalaya mu Luuka ne, mu matuku a . . . kumpala kwa Dilwa dya Mukalenge, nebiikale bu mwakadibi mu matuku a Sodoma, ne piikala Mwânà wa muntu mwa kudibuulula Yêyè mwine, bu muvwa Mwânà wa muntu mudibuulule Yêyè mwine kwaka kudi Abraham; Elohim, Nzambi, mwandamuke mubidi munkaci mwa bantu, ne wâkasomba kuntwaku ne Abraham ne wakamuleeja, wakamwambila bivwa Sarah udyambidila (musômbe paanyima Pende) mu ntenta, uvwaYe kacya kayi mwanji kumona. Wakamwambila bivwaye . . . Ne wakamuteela mu dînà ne, “Sarah.” “Abraham,” kacyi dyende—kacyi dyende dînà dya Abram, dyakapatukaye naadi adi to, kadi Abraham. Kayi Saraï, S-a-r-a-ï to; kadi S-a-r-a-h: “Mukajeebe Sarah udi penyî?”

Yêyè ne: “Nyawu mu ntenta amu paanyima Peebe apu.”

⁹³ Yêyè ne: “Nênnùm wênèkèlè bilondeshile cikondo cya mwoyi.” Ke kutapaye kaseku. Yêyè ne: “Wàsekî bwa cinyi?”

⁹⁴ Mpindyewu, Yesu wakamba ne: “Anu kumpala menemene kwa dipangakanangana dinene edi kusangishiibwadi ne kwoshiibwadi, Mwânà wa muntu neadibuulule Yêyè mwine mu mushindu umweumwe wakenzaYe cikondo aci awu.” Nenku aci cidî . . . Ncinyi aci? Ndibandishiibwa, cyakabidi, kumpala kwenu nwênù, ne Yesu Kilisto udi umweumwe awu makeelela, leelu, too ne kashidi. Nudi nwitabuujâ nanku anyi? Nanku twinyikaayaaku mitu yetu bwa kusambila.

⁹⁵ Nzambi munanga, tudi baKunange. Dîyî Dyebe ndyûle tente menemene—menemene ne Cyakudya bwetu twêtù, Mukalenge. Tudi baDinange be! Tudi ne mwoyi nku Dyôdi adi, Mukalenge. Mbimweneke ne bwetu bukole kacya kabutuku bukumbane to. Tudi banange anu kwikala basômbe ku meesa Ebe, banyungulukile Dîyî Dyebe, biikale tusankila mabenesha, Mukalenge, patudi tudisangisha mushindu ewu, bânà beetu baa balume ne baa bakaji baakasumbiibwa ku Mashî kudi Mwânà wa Nzambi, badi cintu cisumba ku Mashî Ebe. Nenku tudi balwe mwaba ewu diloolo edi, Mukalenge, balambule diloolo ne diloolo dya matuku aa bwa disambidila babeedi. Ne bilondeshile Mifundu, Wêwè wâkamba ne “ku

mibundabunda twâkondopiibwa.” Kabicyena mene kabidi bikengela bwa kusambila to (anu kutonda mpekaatu yetu), bwalu ku mibundabunda Yebe tukaadi (cikondo cishaale) bondopiibwe. Kaa, ndituku kaayipu dya disungidiibwa’s we! Mmulayi kaayi—kaayi ewu wa kudi Emanuwele’s we! Ngwa ne Cyôci aci m’Bulelela bwa menemene.

⁹⁶ Wêwè wâkamba ne: “Mu mutanci mukese ewu, baa pa buloba kabaakuMmona kabidi to, kadi nwênù nenuMmone, bwalu Mêmè” (mupinganyi muleeji muntu “Mêmè”) “Mêmè nêngikalè neenu, ne munda mwenu mene, too ne kundekeelu kwa buloba.” Nenu ku ndekeelu wa cikondo, dikumbana dinene dya maalu ônsò edi, Wêwè wâkamba, kumpala mene kwa kwenzekabi, ne nebiikale menemene anu bu mwakadibi kumpala kwa kapyia kuponaku mu Sodoma ne kwoshaku kushiidisha buloba bwa Bisamba bya bende, ne nekulwe cyakabidi dibuuludiibwa dya Mwânà wa muntu anu menemene mwakadibi ku Sodoma. Taatu, swaku bwa bantu kabapangi kumona aci to.

⁹⁷ Nenu ndi ndomba, Nzambi, byenze bu kaacintu kakesee anu ne bujimà bwaku, (piikalabi ne ndi mwambe cya cyanaana, wamfwaku luse), nkôka ngela biteshi. Ndi mubanange, Mukalenge. Ndi—ndi ndomba bwa kabapangi kucimona to. Eci ciikaleku dimwe dya ku maloolo manene, Mukalenge. Swaku bwa mubeedi yônsò, mwena lutatu, mpofo, nî nganyi yônsò udiku munda emu awu, Mukalenge, bondopiibwe diloolo edi. Swaku bwa ngènzàmpèkààtù yônsò asungidiibwe. Anu mu myoyi yabo mpindyewu mene, piikalaye mwena bupidya, swaku bwa yêyè akidile Kilisto pa dîbà edi. Twènzèlèku bwalu abu, Taatu. Byônsò bidi mu byanza Byebe. Nyewu tudilambula Kûdi, bwa kuKumona ulwa munkaci mwetu.

⁹⁸ Ne Wêwè wâkamba, mu Yone Munsantu 14.12 ne: “Ewu udi ungitabuuja Mêmè, byenzedi bîndi Mêmè ngenza yêyè neàbyènzè pende.” Mushindu mwine utudi twètù aba bamanye ne Wâkadimanyisha Wêwè mwine kudi bantu, bu mudibi ne Wêwè ke uvwa Muprofeta awu uvwa Môsà mwambe ne neajuuke. Kabavwa bapete baprofeta to kukaavwa bidimu nkama, dipanganangana dikaavwa ditampakane ku nseke yônsò, kadi paabi’s bivwa bikengela ne Dìyì dya Nzambi dyûlè; ke Dìyì kwadamukadi mubidi, ne dipanganangana paadi. Nenu, Taatu, nyewu tubimona cyakabidi lelu wa Ndaaya ewu, dipanganangana dyenda dishaala cisumbu cinene menemene cimwepele; ne tudi tumona Dìyì dyenda dishaala mushindu umweumwe awu. Tubenesheku diloolo edi, Taatu. Nyewu tudilambula Kûdi, pamwe ne Dìyì Dyebe. Cyônsò cyûdi Wêwè ujinga bwa twètù kwenza, enzaku neetu, Mukalenge. Mu Dînà dya Yesu. Amen.

⁹⁹ [Mwaneetu wa bakaji kampanda udi wakula mu mwakulu mwenyi. Katupa kaa mukaba wa mêyi munda mutupu—Muf.]

Katwena bamanye cyāmbiYe to. Mmufwanyine kwikala ujinga kutwambila bwalu kampanda, pa nanku shaalaayi anu mu kaneemu bwa katanci kakese cyanaana. [Katupa kaa mukaba wa mēyi munda mutupu. Mwaneetu wa balume kampanda udi ufila dyandamuna.]

¹⁰⁰ Amen. Nukaadiku babale [Katupa kaa mukaba wa mēyi munda mutupu—Muf.] Mufundu uvwa mwena lukuna mwikale ulwa, bôbô paabo biikale badisangishe kaaba kamwe, nenku bôbô...mwena lukuna uvwa ne bukole bwa kanzekele. Ke Nyuma wa Nzambi kwikila muntu mulume kampanda, kumwambila, ke yêyê kwamba ciproleta, kwambaye mwaba uvwa ukengela kuya ne kushaala baalamine, ke bôbô kubutula mwena lukuna wabo awu. Ke cyôci cilwalwa kabidi aci. Mwaba wa kubutwila mwena lukuna wenu ngwôwô awu, nwamonu's, angataayi cyanza cya Nzambi. Cyanza cya Nzambi n'Kilisto, mu bushuwa bwa bwalu, Dîyi, pa nanku angataayi Dyôdi adi mu myoyi yenu diloolo edi patudî tubiikila mulongo wa babeedi apa.

¹⁰¹ Ngela meeji ne Billy mmwabanye cyakabidi twarta twa disambila leelu ewu. B, twa B, twangataayi B, makumi mwandamukulu ne itaanu. Makeelela diloolo, tuvwa bangate dikumi ne tutaanu makeelela diloolo. Tutu tuditacisha pa ciibidilu bwa kwangata tutwe ku dikumi ne tutaanu diloolo dyônsò. Nenuku ewu kwataayi twarta twenu, netûtwangâtê, mpindyewu. Twānjāāyi kuteeta ne dikumi ne tutaanu. Makumi mwandamukulu ne itaanu. B, bu Branham, nudi bamanye. B, kuumukila ku makumi mwandamukulu ne itaanu too ne ku lukama. Nenuku tudi...Tumonebi, nganyi udi ne B, makumi mwandamukulu ne itaanu, ela cyanza muulu tūng. Wêwê udi mutwishiiabwe ne...Kaa, mundekeelu mwamwa, eyo, makumi mwandamukulu ne itaanu bandila kuneeku.

¹⁰² Mpindyewu, mwanaanyi wa balume...Pa nanku nkufwanyine kwikala beenyi mwaba ewu, bafwanyine kupanga kumanya mudibi byenjiabwe. Mwanaanyi wa balume utu upweka mwaba ewu, anyi muntu kampanda; yêyê kayi ne mushindu wa kulwa to, Mwaneetu Borders, muntu kampanda mukwabo. Muntu kampanda neapweke, wangata twarta etu, lukama lujima, wimana kumpala kwa bantu utucyompakaja twônsò. Ke bwa cinyi padiye ukupa karta, kêna ne mushindu wa kukwambila ne neubande pa cibumba cya ku cyambilu eku to, kî mmumanye aci to. Nansha mêmè ncyêna mumanye to. Ndi mêmè mfika diloolo adi, nkoka anu dikumi anyi dikumi ne tutaanu cyanaana, mwaba kampanda, mu twarta amu. Ciine aci kaciyena ne dipetangana ne dyondopiibwa dyebe to. Udi wêwê mwa kusômba anu mwaba awu. Monaayi, makeelela diloolo. Mbanganyi bavwa mwab'ewu makeelela diloolo, tumonebi cyanza cyebe? Mushindu mwine uvwa bantu bondopiibwe myaba yônsò ku ntwadijilu too ne kundekeelu kwa disangisha's!

¹⁰³ Mpindyewu, civwa mmakumi mwandamukulu ne itaanu, makumi mwandamukulu ne isambombo, makumi mwandamukulu ne mwandamutekete, makumi mwandamukulu ne mwandamukulu, makumi mwandamukulu ne citeema, makumi citeema. Tubafikishaayi mwaba ewu mpindyewu mene. B, makumi mwandamukulu ne itaanu, makumi mwandamukulu ne isambombo, makumi mwandamukulu ne mwandamutekete, makumi mwandamukulu ne mwandamukulu, makumi mwandamukulu ne citeema, makumi citeema. Awu mmufwanyine kwikala umwe...Cya bushuwa, tudi dijinga ne...Nenku muntu kampanda yèyè mwikale...Mukwabo nyewu, eyo, awu mmufwanyine kumba kukumbaja bwalu abu. Makumi citeema, kuumukila ku makumi citeema too ne ku lukama mpindyewu. Makumi citeema, makumi citeema ne umwe, makumi citeema ne ibidi, makumi citeema ne isatu, makumi citeema ne inaayi, makumi citeema ne itaanu, makumi citeema ne isambombo, makumi citeema ne mwandamutekete, makumi citeema ne mwandamukulu,-ma ne citeema.

¹⁰⁴ Wèwè kuyi ne mushindu wa kutentemuka to, pawikala... Ndi mmona ne tudi ne makalu a bikalaba abidi, asatu mwaba ewu mpindyewu, anaayi majima, ngela meeji, mûndi mwa kumona. Pawikala ne karta kaa disambila, nomba udibo babiikila awu—awu mwikale webe, kadi kuyi ne mushindu wa kutentemuka to, ela anu cyanza cyebe muulu, netukupuuse mu dikalu adi tukufikishe mwaba ewu.

¹⁰⁵ Kadi wèwè kuyi mupete karta kaa disambila to, sòmba anu kaaba aku mwikale usambila, wamba ne: “Mukalenge Yesu, cii—cii—ciikaleku mêmè diloolo edi.” Mbanganyi munda emu badi kabayi ne karta kaa disambila, ela cyanza cyebe muulu. Kaa, ekelekele! Eyo, mpindyewu, twâmbâayi anu eci, ndi ntekemena ne kacyakwikala bu kushipa kwa cijila to. Kadi kuvwa musangu kampanda mukaji mukwabo uvwa kayi ne karta kaa disambila to, mutudi bafwanyine kwamba. Kuyaye wenda udifinda mu musumba wa bantu amu, wamba ne (mpindyewu telejaayi ne ntema): “Mêmè mudidinge anu mulenge ku bilâmbâ bya Muntu wawa, nêngũmwè bîmpè.” Mbanganyi badi bamanye bwalu abu? Eyo. Kadi wakenza cinyi? KuMulengaye, kuumuka kadi kuya kasòmba. Ke Yesu kukudimuka, kumanyaYe mwaba uvwaye usanganyibwa. Neya bushuwa anyi? KumanyaYe lutatu lwende. Neya bushuwa anyi? KumanyaYe lutatu lwende, ke kumwambilaYe lutatu lwende alu. Nenku yèyè kudyumvwa mu mubidi wende ne disaama dya mashi alwa munda adi dyakiimana. Neya bushuwa anyi? Bwa cinyi? WakaMulenga.

¹⁰⁶ Mpindyewu, mbeena Kilisto bûngi kaayi mwab'ewu diloolo edi badi bamanye, bilondeshile Ebelu, Mukanda wa Ebelu, ne Yesu udi mpindyewu mene Mwakwidi Munene awu, Mwakwidi Munene udi mwa kuumvwa padi mateketa etu amulenga? Ke cidiYe anyi? Eyo, piikalaYe Mwakwidi Munene umweumwe awu,

mudimu umweumwe awu, Mwakwidi Munene, mMufwanyine kwenza maalu bishi dībà adi? M’Mufwanyine kwenza maalu anu mushindu umweumwe wa bwena wakenzaYe cikondo aci awu. Nudi nwitabuujā nanku anyi? M’Mufwanyine kwenza maalu anu mushindu umweumwe wa bwena wakenzaYe cikondo aci awu, pawikala mwa kwitabuujā nanku. Eyo. Mbanganyi badi biitabuujā nanku, mwikale wela cyanza cyebe muulu, wamba ne: “Ncya bushuwa ne ndi ngitabuujā nanku”?

¹⁰⁷ Eyo, kumpala kwa kwenzabo mulongo wa babeedi, twêtù twēnzàayi mulongo wa babeedi mwaba awu. Ndi mumanye ne Yêyè udi mwaba ewu. Ndi—ndi—ndi ngumvwa Bwikadi Bwende, ne ndi mumanye ne Yêyè udi mwaba ewu. Lwâyaaku. Mulongo wa babeedi wākumbanyi anyi? Nkaavwa mbiikila badi paapa baba. Sambilaayi anu—anu cyanaana, tangilaayi anu luseke elu nusambile, nwitabuujā cyanaana.

¹⁰⁸ Inăbànzà musòmbe anu mwab’ewu kacya wantangila, musòmbe ku luseke lwa inăbànzà udi mwase binete ewu. Kanwenaku mwa kumona Cyôci aci cilebelele kumutu kwa mukaji wawa anyi? Tangila kuneeku. Nwamonu anyi? Udi ne disaama dya mwoyi. Udi witabuujā ne Nzambi neakwondope anyi? Pawikala witabuujā, ela cyanza cyebe muulu. Ke lutatu lûvwâ naalu alu. Ncya bushuwa. Mpindyewu piikala lutatu lwebe luvwa ndwôlô alu, ela cyanza cyebe muulu bwa bantu bamone, ela cyanza cyebe muulu nunku *ewu*. Mpindyewu, kucyena naadi kabidi mpindyewu to. Diitabuujā dyebe dyakwondopi.

¹⁰⁹ Yêyè udi umweumwe awu makeelela, leelu, too ne kashidi. Kaa, kudi dipangakanangana; kadi Yesu Kilisto udi umweumwe awu makeelela, leelu, too ne kashidi. Eci cidi. . . Mpindyewu tungunukaayi anu ne kusambila, nwamonu’s, kabyena bikengela anu babande kuneeku eku to, bwa nwênù kumanya.

¹¹⁰ Mpindyewu, inăbànzà nyêyè ewu. Bwa ku dyanyi dimanya, ncitu mwanji kumumonaku to kacya bandela, yêyè mmuntu mukaji pende anu nanku mwimane apa, mwikale ne karta kaa disambila, ne kuvwa nansha mumanye ne nebakubiikile anyi to. Muntu mmukupe anu karta kaa disambila patupu, nenku wêwè—webe nomba pende kubiikidiibwaye, ke wêwè peebe kubanda apa. Ncya bushuwa anyi? Ne mêmè mwine paanyi ncyêna ne mushindu wa kumanya ne wêwè mwine ewu udi cinyi, udi nganyi, kûdi mufume mpenyi, cyûdi mene ukeba ncinyi to, cintu nansha cimwe pa bwalu abu. Mêmè ndi anu muntu mulume paanyi nanku awu, wêwè peebe muntu mukaji. Ncya bushuwa. Cimfwanyi cimwecimwe eci cyakalwa musangu kampanda mu Bible, Yone Munsantu, nshapita 4.

¹¹¹ Mpindyewu udi wamba ne: “Ciwênjì ncinyi, Mwaneetu Branham, katanci aka, katanci kâpici aka?” Ndi mukoke kadi kwela anu biteshi kakese cyanaana, nwamonu’s. Ncyêna

mumanye to, nwamonu's. Yèyè ngudi ne cya kucyenza. Mèmè ncyèna mumanye to. Mmunyi mudi mukaji wawa mwenze? Mèmè nciitu mwanji kumonaku mukaji wawa to kacya bandela. Mmwenyi anu wa menemene ewu kùndi. Ngela meeji ne uvwa mmuntu mukaji. Muntu udi ufuma ku dyondopiibwa mpindyewu awu nganyi mwamwa naka mu bateeleji? Udi mwa. . . Eyo. Tudi bõnsò katuyi bamanyangane to. Piikala aci cya bushuwa, nyungisha cyanza cyebe mushindu *ewu*. Nwamonu anyi? Nciituku mwanji kumona mukaji wawa kacya to. Kadi yèyè uvwa musòmbe mwaba wawa, mwitabuuje. Mpindyewu, wàlengì Cintu kampanda, kî mmwômò anyi? Kabivwa ne mushinga bwa kundengaye mèmè nansha.

¹¹² Kadi mpindyewu kanwenaku mwa kumona ne Bible n'Diyi dya Nzambi menemene anyi? Yèyè udi umweumwe awu makeelela, leelu, too ne kashidi. Tudi tulwa ma-tabernacles a Nyuma Mwimpè awu udi Kilisto. Nwamonu anyi? Ke Dimiinu dilelela ndyadi. Nenku padi Nyuma Mwimpè mulelela awu ubwela mu Dimiinu dilelela dya Diyì, kabiya. . . Kaakwikala anu citupa cya Dyôdi adi to (bwalu, dyabulu udi ukwata mudimu ne Dyôdi adi), bikengela uDyangàtè dyõnsò, wamonu's, Diyì dyõnsò dya Dyôdi adi; bwalu, Yèyè kî n'Nzambi citupa to, Udi Nzambi mujima. Nwamonu anyi? Nenku ke cidi cyenzeka ncyaci.

¹¹³ Mpindyewu, muntu mukaji nyèyè ewu, kacya nciitu mwanji kumumonaku to. Yesu wakasangana muntu mukaji anu bu mudiye emu musangu kampanda, pàmwäpa kayi mu ngiikadilu umweumwe ewu to, ncyèna mumanye. Nenku Yèyè uvwa musòmbe ku ciinà cya mâyi kampanda. Bivwa bikengela bwa Yèyè—Yèyè kupweka kuya mu Samaaleya. Nenku tudi tujandula ne, Samaaleya uvwa kwinsi kwa kakuna. Nenku—nenku Yèyè kuvwaye uya, nku Yeleko's we, kadi Yèyè kunyunguluka kupicila mu Samaaleya, ke kufika mu cimenga cya Sychar. Ke kusòmbeYe pa ciinà cya mâyi aci, kadi kutuma bayiidi Bende bwa kuya kakebabo byakudya.

¹¹⁴ Bisa bya bantu bidi binga pa buloba ebu? Bisatu. Beena Ham, beena Sem, ne beena Yafete. Twètù bõnsò tudi bafumine kudi Noa. Nenku bakwabo bantu baakabutudiibwa musangu awu. Anu bisa bisatu bya bantu, beena Yuda, baa Bisamba bya bende, ne beena Samaaleya (aba bõbò bavwa citupa beena Yuda citupa baa Bisamba bya bende). Nenku ke bisamba byõnsò bidi pa buloba mbyõbi abi, nwamonu's, anu bisatu.

¹¹⁵ Byõnsò mu Nzambi mbipwangane mu isatu. Anu mudi isatu ya bwena ìmvwà ngamba diloolo edi eyi: bitupa bisatu bya dipangakanangana, bitupa bisatu bya Diyì dyandamuke mubidi, ne bikwabo. Nwamonu anyi?

¹¹⁶ Mpindyewu, nenku Yèyè—Yèyè uvwa wakula ne beena Yuda awu, wakambila Filipino, paakalwaye ne Natanaela apu, mwaba uvwaye, ne: "Mvwa mumumone pavwaye usanganyiibwa

mwinshi mwa mucu.” Wakambila...Andele uvwa mulwe ne Peetelo, Yèyè ne: “Dinà dyebe n’Simona, kadi nebiikale bakubiikila ne ‘Peetelo’ kubangila ku mpindyewu.” Yèyè ne: “Udi mwânà wa Yona.” Nwamonu anyi? Mpindyewu, bônsò abu bavwa beena Yuda.

117 Kadi ke Yèyè ewu uya kudi muntu wa baa Bisamba bya bende...kavwa wa baa Bisamba bya bende to, kadi mwena Samaaleya.

118 Mpindyewu ncikondo cya baa Bisamba bya bende. Kacya Yèyè kaakenzelaku baa Bisamba bya bende cyôci aci musangu nansha umwe to. Kenketaayi mu Mifundu. Kacya. Kadi Yèyè wakalaya, mu Luuka 22 ne, Uvwa mwa kucyenza kumpala menemene kwa Dilwa.

119 Kadi Yèyè kusòmba mwaba awu, ke muntu upatuka ewu mwikale citupa mwena Yuda citupa wa baa Bisamba bya bende, muntu mukaji. Ke Yèyè kumwambila ne: “Mukaji, Ntwadileku mâyi a kunwa.”

120 Awu ne: “Mona’s, kî ng’Wêwè uvwa ne cya kundomba aci to, nansha twamba. Tudi...Kutu disungulujangana muneemu emu. Wêwè ewu’s udi mwena Yuda, ne—ne mêmè mwena Samaaleya.”

121 Yèyè ne: “Kadi bu wêwè nanshà mumanye mwine Ûdì wakula nende ewu, wêwè’s nguvwa mwa kundomba Mêmè mâyi a kunwa.” CivwaYe wenza aci ncinyi? Ukeba kulenga nyuma wende. Nenku mmwenze anu upeta lutatu luvwaye naalu, ee, ke kumwambilaYe bwa aye kakeba bayende. Yèyè kwamba ne kavwa nende to. Yèyè kwamba ne: “Bwa aci ncya bushuwa, ukaavwa naabo bataanu.”

122 Mpindyewu, tangilaayi, paakaMumona Bafaalesa wenza ciine aci. Eyo, dipangakanangana adi anu munkaci mwa Dîyi menemene, bôbò baakamba cinyi? Baakamba ne: “Ewu Muntu m’Beelezebula, mwena lubuku.” Nwamonu anyi?

123 Ke Yesu kwamba ne: “Ewu yônsò wâkula nanku bwa Nyuma Mwîmpè paalwaYe kwenza cyôci cimwecimwe eci, kabaakumufwilaku luse to.” Ke dipangakanangana dyenu ndyôdì adi. Nwamonu anyi? Kadi Yèyè wakamba ne Uvwa mwa kubafwila luse cikondo aci, bwalu Nyuma Mwîmpè kavwa mwanji kulwa to; Mulambu, Mwânà wa mukooko kavwa mwanji kufwa to.

124 Kadi piine apu mukaji awu kaakeela awu meeji to. Mukaji awu wakamba ne: “Mukalenge, ngajingululu ne Wêwè ewu udi muprofeta.” Kabavwa bapete muprofeta to kukaavwa bidimu nkama. Yèyè ne: “Ngajingululu ne Wêwè ewu udi muprofeta. Mpindyewu twêtù tudi bamanye ne Maasiya, udibo babiikila ne Kilisto awu, paalwaYe, ke cyenzaYe ncyôci aci.”

125 Ee, piikalabi ke cyakenzaYe, pa nanku’s Yèyè udi umweumwe awu makeelela, leelu. Mushindu awu ke

wakaDimanyishayeYe cikondo aci, kî ncintu cimwecimwe aci leelu ewu anyi? Bikengela ciikale anu cyôci aci! Mpindyewu, muntu mulume ne muntu mukaji nyewu basambakeene cyakabidi. Yêyè kî nyêyè mukaji awu to, mêmè ncyêna Muntu mulume awu to. Kadi nansha nanku Nyuma Mwîmpè umweumwe awu udi mwaba ewu, ne wakenza mulayi ne byenzedi byakenzaYe, netwënzè cintu cimwecimwe aci mu matuku abuuludiibwa Mwânà wa muntu.

¹²⁶ Mpindyewu. Nciyi mukumanye to (ne wêwè udi mumanye ne ncyà bushuwa), katwena bamanyangane nansha kakese to, ne wêwè nyawu udi mwimane mwaba ewu. Kudi bamwe... Kudi mwa kwikalà cintu kampana cikutacisha, pàmwâpa kacyenaku to, ncyêna mumanye to. Kadi bu Mukalenge Yesu mwa kumbuulwila, ku Nyuma Mwîmpè Wende, cidi cikutacisha aci, pa dîbà adi newitabuuje ne Aci m’Mwânà wa Nzambi, kî mmuntu anyi? Eci cidi anu cizubu cyanaana, ewu tabernacle udi—udi Nzambi ukwata nende mudimu ewu, yônsò udiYe pende musungule awu. Yêyè—Yêyè udi ucyenza ku ngâsà mudishikamine ne disungula. Pa nanku, kadi wêwè itabuuja. Newitabuuje anyi? [Mukaji awu udi wamba ne: “Amen.”—Muf.]

¹²⁷ Mbanganyi mu bateeleji emu biikala mwa kwitabuuja aci? Nyewu tudi bônso babidi biimane mwaba ewu kumpala kwa Bukênkè, bwa ne katutu banji kusambakeenaku to kacya baatulela, ncyêna nanshà ne cingenyinyenyi cya ne mukaji mwine wawa nganyi, udi cinyi, mmufume penyi, cidiye ukeba ncinyi to. Ncituku mwanji kumumona to kacya bandela, anu mudibi ne ncituku mwanji kumona wawa mukaji to kacya bandela. Kadi, udi umona, cîndî nteeta kukufikisha ku dyanza ncyeci: kumusha dipanganangana adi kûdi mpindyewu, ne kwitabuuja Dîyî piikala Dîyî dyandamuke mubidi apa mene munkaci mwetu emu. Dîyî didi dilwa ne mwoyi mu mubidi wetu twètù biine, ciikale cileeja Bwikadi bwa Nzambi.

¹²⁸ Mpindyewu Yêyè anyisheku amwenzele bwalu abu. Udi ujinga cintu cya mushinga. Kêna ne mwânà to, udi ujinga mwânà. Ukaadi ne bidimu biipacila ku makumi anaayi. Aci mu bulelela kî ncintu cidi mwa kubenga kwenzeka to.

¹²⁹ Nyawu basômbe mwaba wawa mpindyewu ewu, bakaji bavwa bankumba kacya baabalela, kadi mbalwe anu pa cibumba cya ku cyambilu eci mushindu ewu, Mukalenge kadi kubapeesha bânà. Bamwe baa kunudi badi bamanye bwalu abu elaayi byanza muulu kunudi aku tûng. Nwamonu anyi? Nwamonu anyi? Mwawa mwambule kânà kaa bakaji kakese kîmpè kumona dîngà dituku, mu dyalumingu, paanyima paa mêmè mumane kuumuka apa, mu mapingaja a mu dyalumingu; mamwëndè uvwa nkumba, Mukalenge e kwakula. Nenku kânà kakese kaa bakaji aku, kânà kakese kalenga kaa dikema, kadi mwaba ewu anyi? Kadi penyi? Eyo. Nkôkô aka, lwa apa nenku, kasômbe mwaba ewu. Mamwâkù nyêyè wawa musômbe mwaba

wawa. Kâna kaa bakaji aku's nkôkô aka, kôkô kiine. Nudi bakamone anyi? Kavwa Dîyi dyakula dya Nzambi.

¹³⁰ Mpindyewu, neuMwitabuuje ne mwoyi webe wônsò anyi? Udi witabuuja ne dibenesha dyûdi naadi adi, dyûdi uumvwa munda mwebe mpindyewu adi, n'Nzambi udi mwandamune anyi? Bu Nzambi mwa kungambila dînà dyebe, bwa wamona mwa kwinyika mwânà awu dînà, udi mufwanyine kwitabuuja? Nanku, Mandamu Thompson, udi mwa kwalukila kwebe kumbelu upete mwaneebe awu, pawitabuuja ne mwoyi webe wônsò.

¹³¹ Udi witabuuja ne mwoyi webe wônsò anyi? Ikala anu ne diitabuuja, kwedi mpatà to, itabuuja wêwè anu Nzambi. Nzambi udi Nzambi.

¹³² Wetwawu, mukalenge! Ndi ngela meeji ne katwena bamanyangane to, twétù peetu. Wanyi musangu wa madyatambala wa kukumonaku kacya bandela, bwa ku dyanyi dimanya, mpauvwa wenda ulwa kwaka naka apu. Ke mêmè kudyambidila ne uvwa mansebende wa Mwaneetu Shakarian, anyi nî nganyi. . . Mashagian, Mwaneetu Mashagian, kangimba awu, pawâpicidi kaaba aka apu. Ke pathiishe mêmè kukumona uya ku mulongo wa babeedi. Mpindyewu, bu mûndi mwenyi neebe, kaa, anyi kûdi, ne mêmè mwikale mwenyi, ne wêwè ne mêmè. Mpindyewu, bu Mukalenge Yesu mwa kungambila cintu kampanda cyûdi—cyûdi wêwè, pâmwâpa cyûdi ujinga, twânji kwamba nanku awu; kukwambila ne ncikampanda, ungambila cyûdi ujinga. Mpindyewu, Yêyè's nyawu ukaadi mumane kukupeeshaci. Cintu cimwepele cidi anu diitabuuja dikumbane bwa kuciitabuuja.

¹³³ Mpindyewu, mbanganyi badi bumvwa aci? Anu diitabuuja dikumbane bwa kwitabuuja ne udi upeta cyûdi ulomba aci. Nwamonu anyi?

¹³⁴ Mpindyewu, mpindyewu, pawikala mubande mwaba ewu ujinga cintu kampanda, ne Yêyè mwa kungambila cidi dijinga dyebe, piine apu ngwêwè mwikale mumanye ne mêmè ncyèna mumanye dijinga dyebe to, nenku cidi ne cya kwikala Cintu kampanda mwaba ewu ciikale cicyenza. Mpindyewu, bilondeshile Dîyi, Yêyè wakalaya bwa kucyenza. Uvwa umanya meeji avwa mu myoyi yabo. Ncya bushuwa anyi? Eyo.

¹³⁵ Udi ne dijinga dinene dya kwondopiibwa. Cintu cimwe, udi ne disaama dya mutu unyunguluka, mutu unyunguluka bikole. Ncya bushuwa. Cintu cikwabo, udi ne disaama dya nyima, ne nyima mwine awu mmukusaame bikole be kukaadi cikondo kampanda, bakaadi mene bakupande ne dikupanda mwine nyima awu. Aci cidi EMU MMUDI MUKALENGE WAMBA. Ncya bushuwa. Nwamonu's. Ncya bushuwa. Nenku kudi cintu cikwabo, dijinga dyûdi naadi dya ndondo, ndya ne, udi ujinga

kupeta dibatiiza dya Nyuma. Ncya bushuwa menemene. Lwâku mwaba ewu.

¹³⁶ Nzambi munanga, mu Dînà dya Yesu Kilisto, swaku bwa muntu ewu uujibwe tente ne Nyuma Mwîmpè, kumpala kwa kuumukaye mu mwaba ewu, mu Dînà dya Yesu. Amen.

Mpindyewu Mupetaaku, mwaneetu wanyi. Ikala anu ne diitabuuja, kwedi mpatà to.

¹³⁷ Wetwawu! Ngela meeji, bwa ku dyanyi dimanya, katwena bamanyangane to. Piikala aci cya bushuwa, mona's, bwa bantu kumanyabo, ela anu cyanza muulu cyanaana bwa bamanye ne katwena bamanyangane. Ncitu mwanji kumumonaku to kacya bandela, ku dyanyi dimanya. Ne ndi ngela meeji ne yèyè katu mwanji kummonaku to, amba anu mummwene mu bateeleji mwamwa. Bwalu Taatu wa mu Dyulu mmumanye, ne ke Diyè Dyende didi ditekwa mwaba ewu edi, bwa ne ncitu mwanji kumonaku mukaji ewu to, ku dyanyi dimanya, kacya bandela. Ke bwa cinyi, ncyèna mufwanyine kumanya ne udi mwaba ewu mbwa cinyi to, ncyèna ne cingenyinyeni cya ne wèwè udi nganyi, udi cinyi, anyi nî ncinyi nî ncinyi pa bwalu bwebe to. Ncyèna mufwanyine kukwambila bwalu nansha bumwe to.

¹³⁸ Cintu cimwepele, ndipà cyanaana. Bu mêmè mwa... Bu munwangumvu ngumvwija mutanci ewu. Anu kushiya mwaba, kuteeleja cidiYe wamba; cîndi mmona, ke cîndi mwa kwamba. CidiYe kayi wamba to, ncyèna mwa kucyamba to. Ndi mufwanyine kucyamba mu mêmè, kadi cifwanyine kwikala cya cyanaana. Nwamonu anyi? Ncifwanyine kwikala cya cyanaana. Kadi piikalabi ne Yèyè ngudi ucyamba, ncyà bushuwa kacyi kwela mpatà to. Kacyena mwa kwikala, kacituku cyanji kwikala cya cyanaana to. Kacyadyakwikalaku cya cyanaana to padici cishaala anu Nzambi. Nwamonu anyi? Nwamonu's, bwalu Nzambi kêna mwa kwamba cya cyanaana to.

¹³⁹ Kadi bu Nzambi mwa kungambila cyûdi ukeba, cidi dijinga dyebe aci, anyi—anyi cyûdi muvwile mwaba ewu aci, cintu cyûdi mwenze, anyi cintu kampanda, cintu kampanda cya bu nanku awu, anyi ne wèwè udi kampanda, udi mufumine mwaba kampanda, anyi cyônsò cidiYe muswe kungambila aci, udi mufwanyine kwitabuuja anyi? Twasakidila.

¹⁴⁰ Cintu cimwe, udi usaama makàsà. Makàsà adi akutacisha. [Mukaji awu udi wamba ne: "Eyo."—Muf.] Aci ncyà bushuwa. Juula cyebe... Udi ne disaama dya bakaji, lutatu lwa bânà bakaji. ["Eyo."] Ne udi ne dijinga dinene mu mwoyi webe, bwalu udi ufuma ku dijimija muntu anyi cintu kampanda. Mmwânà wa balume, ne mwanebe wa balume mwine awu mmumuke kumbelu, munyeeme muye, nenku udi ukeba bwa mêmè kusambila bwa kwalukilaye. ["Eyo."]

¹⁴¹ Nzambi udi mu Dyulu, mutuminaaku mwanende awu, ne dyondopa. Nyuma Mwîmpè imanyike nsongalume awu mu

njila diloolo edi, amwaluje kudi mamwëndè. Mu Dîna dya Yesu. Amen.

¹⁴² Yèyè udi mumanye awu ke wâkutùminayè. Kulubakaji meeji to. Itabuuja mpindyewu, kwedi mpatà to. Ikala anu ne diitabuuja, ne mwoyi webe wònsò. Wèwè udi witabuuja, ne Nzambi neafile bikwabo byònsò.

¹⁴³ Mpindyewu, anu dijingulula adi misangu isatu anyi inayyi, nî ncinyi cyònsò aci, nwamonu's, nkaadi—nkaadi mukafike ku mushindu wa cimfomije. Ncyèna mwa kucyumvwija to, kakwena mushindu wa kucyumvwija to. Udi wamba ne: “Udi uswa kwamba ne, anu aci ke cyàm̀bì kunyanga byònsò kupita kuyiisha kuwayiishi munda mwa tusunsa makumi anaayi ne tutaanu anyi kupita apu aku, ke mùdi wela meeji?” Eyowa's, mukalenge. Nansha bu biikale mèbà asatu, kabivwa mwa kwikala bipite mushindu awu to.

¹⁴⁴ Mukaji kampanda wakalenga cilàmbà cya Mukalenge Yesu. Ne bantu abu udibo balenga kî mmèmè to. Mona's, mukaji ewu mwaba ewu, anji tangila anu mwaba ewu, uvwa anu mwa... (Teeka byanza byebe pambidi paanyi apa. Nwamonu anyi?) Nyawu wandengi myaba yònsò, kî mbifwanyine kwenza bwalu to, mèmè ndi anu muntu. Kadi bikengela aMulenge Yèyè. Nenku mèmè, ku dipà, anu—anu... cidi anu cyumuka, mèmè mwine yònsò mujima ngumuka, ne ngamba anu bìndi mmona abi. Nwamonu anyi? Kwajiki. Nwamonu's, kundenga mèmè kakwena ne cidiku kuumvwija to, kadi udiye ulenga n'Yesu kupicila kùndi. Mushindu awu ke uvwa mukaji awu mulenge Nzambi kupicila kudi Yesu, pavwaYe kayi mumanye ne civwa cimutacisha ncinyi to. Wakalenga anu cilàmbà Cyende cyanaana, kuya e kusòmba. Ke Yèyè kwamba—ke Yèyè kwamba ne: “Wàndengi awu nganyi?”

¹⁴⁵ Ke bapostolo kwamba ne: “Kakaa, muntu ne muntu's udi anu uKulenga. Udi wamba nanku bwa cinyi?”

Yèyè ne: “Kadi's ngùmvù bukole bupatuke mu Mèmè.”

¹⁴⁶ Mpindyewu, nutu bamanye ne bukole ncinyi anyi? Dikanda. Wakashaala muteketangane bwa mukaji umwepele wàkaMulenga awu, wa bwalu Yèyè uvwa Mwànà wa Nzambi. Kadi ambaayi tũng mèmè ewu, ngènzàmpèkààtù musungila ku ngàsà ewu? Nudi bamanye bwa cinyi bidi byàbũngì kupita? Bwalu Yèyè wakamba ne: “Bintu bìndi Mèmè ngenza ebi, nenubyènzè peenu. Nenwènzè byàbũngì bipite ebi, bwalu Mèmè ndi nya kudi Taatu Wanyi.” “Bipite bunene,” mudiCi cyambe mwaba awu, kadi dyumvwija dilelela dya mu cyena Gelika didi ne: “Nenwènzè byàbũngì bipite ebi.”

¹⁴⁷ Mpindyewu, inàbànzà ewu ncyèna mumumanye to. Nyèna ne cìndi mumanye nansha cimwe bwende yèyè to. Mmwenyi menemene kùndi anu muvwa bakwabo bantu amu. Katwena bamanyanganeku to. Anu bwa ne bantu bamanye nanku awu,

swaku wèlè cyanza muulu, wamba ne “katwena bamanyangane to.” Mpindyewu, Mwânà wa Nzambi, piikalabi ne musangu kampanda Yèyè wakasambakeena ne muntu mukaaji mu cifwanyikijilu cikese cya mushindu ewu, ku luseke lwa ciinà cya mâyi, ke kuyiikilaYe nende ndambu, ne kumanyaYe mwaba uvwa lutatu lwende, ne kumwambilaYe civwa lutatu lwende. Ke awu kumanyaye ku cyôci aci ne, uvwa m’Maasiya. Mpindyewu—mpindyewu ûndi. . . Wândengi mêmè ewu, mêmè ngakulengi, cintu nansha cimwe kaciyi cyenzeke. Kadi bu diitabuuja dyanyi (ku dipà) ne diitabuuja dyebe (mu kwitabuuja kwa dipà adi) mwa kuMulenga Yèyè, ne Yèyè mwa kwakwila kutudi bwa. . . kûndi mêmè ukwambila wèwè, pa dîbà adi kaayi udi umanya ne Yèyè awu udi mwaba ewu anu muvwaYe ku ciinà aci—aci cya ku Sychar amu. Wamonu anyi? Yèyè udi umweumwe awu makeelela, leelu, too ne kashidi. Udi witabuuja nanku anyi?

148 Udi ne bintu bidi bikutacisha bûngi cyanaana, ntatu bûngi cyanaana, ntatu mikodyakane! Cimwe cya ku bintu binene cyûdi muswe bwa kukusambidila ndisaama dya manungu. Aci ncyà bushuwa. Ncyà bushuwa anyi? Udi uumakana ne disaama dya manungu. Paudi umona ujuula diboko dyebe. . .

149 Kabidi udi mupatuke bu udi wenda wenda bitekete bitekete, bu mêmè mwa kuvuluka bîmpè. Pàmwâpa wânji anu kwindila kakese, pàmwâpa cintu cikwabo cidì mwa kwambiibwa ciikala mwa kwangata. . . Anyi, udi mumanye, utu uumvwa bintu kampanda; bantu, udi mumanye, cyenze bu mupuuya wa mukana ulwa bwa kuCilwisha. Badi bamba ne: “Mona’s, aci mmubuke,” anyi, udi mumanye, mushindu awu.

150 Kadi, udi umweka bu udi muntu wa maalu mîmpè, anji akula naanyi katanci. Twânji twimanebi mwab’ewu kakese, bwalu ndi bulelela ngela meeji ne kudi cintu cikwabo cidì mu mwoyi webe amu cyûdi ukeba kudi Nzambi. Mpindyewu, mêmè kî ngudi mufwanyine kwandamuna ku disambila dyebe to, kadi Yèyè udi mwa kwand-. . . Bwalu, wèwè mucitâbuùje, dikaadi dimana kwandamuna. Kadi wèwè anu muswe kwitabuuja; kukufikisha ku diitabuuja. Mpindyewu, nyawu nkwambila, bidi mbwa munanga kampanda udi kayi apa to, mwikale mwaneenu wa balume, ne mwine mwaneenu awu kêna nanshà mu citupa eci cya buloba to. Udi mu citupa cya buloba cyenze bu cidì cibole ne mâyi, majiba àbûngi. Ndi mufwanyine kwamba ne ncintu bu Michigan anyi bu. . . Eyo, mmu Michigan mudibi. Nenku udi ne disaama dya lufu, disaama dya twonyi didibo kabayi mwa kwondopa to ke didi dimutacisha. Ncyà bushuwa, kî mmwômò anyi? Aci cidì EMU MMUDI MUKALENGÈ WAMBA. Mpindyewu, mushwala ûdi naawu mu cyanza awu, ûvwà wela muulu kumpala kwa Nzambi awu, uwutumine mwaneenu awu kadi umwambile bwa keedi mpatà to, kadi itabuuje, nanku awu, neondopiibwe mpindyewu pawikala wèwè mucitâbuùje.

151 Udi witabuuja ne mwoyi webe wònsò anyi? Monaaku, pa dībà adi, pawikala witabuuja, kudi cintu anu cimwepele cya dyenza, neya ne, kuciitabuuja kakuyi mpatà to. Neya bushuwa anyi?

152 Mpindyewu nudi nwamba ne: “Udi utangila ku cyôci aci, ku bantu abu. Ke cidiye wenza, udi ubatangila.” Nudi nutamba kumona abi be!

153 Kadi bwa kanwikadi nwâvwa kumanya ne ewu. . . Inâbânzà udi apa ewu, vwidila lwa eku nunku, inâbânzà, apa, mubeedi ewu, nansha wêwè mwikale nganyi. Ncyêna mumutangile to. Udi witabuuja ne Nzambi udi mwa kumbuulwila lutatu lûdi naalu? Ela byanza byebe muulu, pawikala witabuuja, ewu inâbânzà udi apa ewu, ewu inâbânzà udi apa ewu, mubeedi ewu. Eyo. Eyo. Bîmpè, nenku pawikala uciitabuuja ne mwoyi webe wònsò, lukoso lwa mfwenke alu kalwakukutacishaku kabidi to. Eyo, alukila kwebe kumbelu wikale mwitabuuje cyôci aci! . . .? . . .

154 Ncivwa mumutangile to, Cyôci aci ke civwa cimutangile anyi? Nudi numona’s, Yêyè. . . Tangila mu *nunku*, cikeena-kumona cidiku nansha nî ncinyi cyenzeke. Amen! Kanwenaku mwa kucimona anyi? Bipwangane bya menemene anu mudi Nzambi mwa kwikala mupwangane!

155 Udi witabuuja, wêwè peebe? Mfwenke udi mwa kukushiila kaaba, wêwè peebe, kî mmwômò anyi? Udi witabuuja ne mmufwanyine kukushiila kaaba anyi? Eyo, nda kambila Mukalenge Yesu ne udi—udi muMwitabuuje.

156 Dîngà dituku mbifwanyine kukengela wêwè kukwata kaa—kaadikombo bwa kwendelaku piikala disaama adi dya manungu dikushiye mulema, kadi kadyakucyenzaku to. Ne wêwè mwine, kwêna witabuuja ne nedikwenze nanku to, kî mmwômò? Udi witabuuja ne neûmvwè bîmpè anyi? Kwata njila ndaaku, nenku Yesu Kilisto wakwondopu.

157 Disaama dya mwoyi ditu dishipangana, kadi kabyena bikengela dikushipe wêwè nansha. Udi witabuuja ne Nzambi nekwondope dyôdi, ne neakupe mubidi tumatuma anyi? Nda mwikale uciitabuuja ne mwoyi webe wònsò, wamba ne: “Neya bushuwa ne ndi nciitabuuja.”

158 Utu wakula Anglais? Utu uumvwa Anglais? [Mwaneetu Branham udi ulomba mwandamunyi—Muf.] (Muntu kampanda alwe.) Eyo, bîmpè. Udi mwa kumwambila bîndi mmwambila ebi anyi? Mwambile ne yêyè mwitabuuje, disaama dya cifu nedimushiile kaaba. Mmuswe—mmuswe kuciitabuuja anyi? Disaama dyebe dya nyima adi nedikushiile kaaba, dyôdi paadi, mpindyewu udi mwa kukwata njila kuya ne kwondopiibwa.

Wetwawu! Udi witabuuja anyi? [Udi wamba ne: “Eyowa’s, mukalenge.”—Muf.]


¹⁵⁹ Muntu mulume udi musòmbè paapa ne disaama dya nyima wawa, muntangile pângambì aci. Udi mwa kwondopiibwa, yêyè pende, pawikala uciitabuuja, mukalenge. Eyo, mukalenge.

¹⁶⁰ Inăbànzà udi musòmbè anu menemene ku luseke lwebe awu, udi usaama nshingu, kî mmwômò anyi, inăbànzà? Udi witabuuja ne Mukalenge neakwondope anyi? Udi muswe bwa kutentekela mwânà wa balume mutekete awu byanza bwa binù byende, bwa kuumvwaye bîmpè, yêyè pende. Udi uciitabuuja anyi? Uvwa ne disaama dya bakaji, disaama dya bânà bakaji, kwêna naadi mpindyewu to. Diitabuuja dyebe dyakwondopu ne dyakupi mubidi tumatuma.

¹⁶¹ Nudi nwitabuuja Yesu Kilisto, umweumwe awu makeelela, leelu, too ne kashidi anyi? Nanku tutentekelanganaayi byanza muntu ne muntu biikale tusambila disambila dya diitabuuja edi, muntu ne muntu wa kutudi, tusambilaayi disambila dya diitabuuja.

¹⁶² Nzambi munanga, patucidi babwikila mushindu ewu mu Bwikadi Bwebe apa, bwa kuKumona utwa eku ne eku mu bateeleji, wenda wondopa babeedi myaba yônsò. Wêwè ngudi Nzambi. Ndi ndomba bwa Wêwè kwondopa bateeleji bônsò aba. Enzaku bwa Mupuuya wa mukana mwa Nzambi ubwele mubishi mu myoyi yabo, ne enzaku bamanye ne dîbà ndivukute lubilu dyenda diya. Tudi anu ne ndambu wa dîbà mukese wa kwikala mwaba ewu, pashiishe netwikale ne Yêyè mene Utudi banange awu. Nenku swaku mpindyewu bwa Bwikadi Bwende butwadile bônsò dyondopa.

¹⁶³ Tudi tupiisha Sataana, tudi tupiisha byenzedi byende byônsò. Mu Dînà dya Yesu Kilisto, Sataana, patuka mu bantu aba.

¹⁶⁴ Bônsò badi baswe kuMwitabuuja mpindyewu, ne kwitaba dyondopa dyenu, juukilaayi kuulu, nwamba ne: “Ndi mpindyewu njuuka kuulu bwa kwitaba dyondopa dyanyi. Ndi ndiitabuuja.” Mushindu ûdî nansha mwikale bishi, pawikala udiitabuuja mu bulelela, juukila kuulu. Mpindyewu ela byanza byebe muulu, wamba ne: “Twasakidila, Mukalenge Yesu, bwa kungondopa.” Nzambi ikale neenu. 

DIMIINU DYÀ DIPANGAKANANGANA LUA65-0118
(The Seed Of Discrepancy)

Diyiisha edi dya Mwaneetu William Marrion Branham, dyakayiishiibwa musangu wa kumpala mu Anglais mu dimwe diloolo, dya 18 ngondo wa kumpala, 1965, bwa Bwobumwe bwa Buloba bujima bwa Beena Kantu-ku-Byanza baa Evanjeeliyo mu Kaabujima ku cilaala-beenyi cya Westward Ho Hotel mu Phoenix, Arizona, U.S.A., ndyumusha pa mukaba wa mêyì ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org